

aur haddí nahín, jaisá mujh men dekhte ho.

40 Aur yih kahke unheṇ apne háth aur pánw dikháe.

41 Aur jab we máre khushí ke īatibár na karte, aur muta'ajjib the, us ne un se kahá, ki Kyá yahán tumháre pás kuchh kháne ko hai?

42 Tab unhoṇ ne bhúní machhlí ká ek tukrá aur shahd ká ek chhattá us ko diyá.

43 Us ne leke un ke sámhné kháyá.

44 Aur un se kahá, ki Yih wuhí báten hain, jinhen maiṇ jab ki tumháre sáth thá, tum se kahá, ki Zarúr hai, ki sab kuchh jo Músá kí tauret, aur nabíon ke nawišton aur zabúron men merí bábat likhá hai, púrá ho.

45 Tab un ke zihnon ko kholá, ki kitábon ko samjhen;

46 Aur un se kahá, ki Yún likhá hai, aur yún hí zarúr thá, ki Masíh dugh uṭháwe, aur tísre din mardon men se jí uṭhe:

47 Aur Yarúsalam se leke sári qaumon men tauba aur gunáhoṇ kí mu'afí kí manádí us ke nám se kí jáe.

48 Aur tum in báton ke gawáh ho.

49 ¶ Aur, kekho, maiṇ apne Báp ke mau'íd ko tum par bhejtá hún: lekin tum, jab tak 'álam i bálá se qíwat na páo, Yarúsalam shahr men ṭhahro.

50 ¶ Tab wuh unheṇ wahán se báhar Bait'aniyá tak le gayá; aur apne háth uṭháke unheṇ barakat dí.

51 Aur aisá húá, ki jab wuh unhen barakat de rahá thá, un se judá húá, aur ásmán par uṭháyá gayá.

52 Aur unhon ne us ko sjida kiyá aur barí khushí se Yarúsalam ko phire:

53 Aur hamesha haikal men Khudá kí ta'ríf aur shukr karte rahe. Ámín.

YUHANNÁ KÍ INJÍL.

I BÁB.

1 IBTIDÁ men Kalám thá, aur Kalám Khudá ke sáth thá, aur Kalám Khudá thá.

2 Yihí ibtidá men Khudá ke sáth thá.

3 Sab chízen us se maujúd huín; aur koí chíz maujúd na thí jo bagair us ke húí.

4 Zindagí us men thí; aur wuh zindagí insán ká nür thí.

5 Aur nür tárikí men chamaktá hai: aur tárikí ne use daryáft na kiyá.

6 ¶ Ek shakhs Khudá kí taraf

se bhejá gayá thá, jis ká nám Yuhanná thá.

7 Yih gawáhí ke liye áyá, ki Nür par gawáhí de, taki sab us ke bá'is se ímán láwen.

8 Wuh Nür na thá, par Nür par gawáhí dene ko áyá thá.

9 Haqíqí Nür wuh thá, jo dunyá men áke har ek ádmí ko roshan kartá hai.

10 Wuh jahán men thá, aur jahán us hí se maujúd húá, aur jahán ne use na jáná.

11 Wuh apnon pás áyá, aur apnon ne use qabúl na kiyá.

12 Lekin jitnon ne use qabúl

kiyá, us ne unhen iqtidár bakhshá, ki Khudá ke farzand hon, ya'ne unhen jo us ke nám par ímán láte hain.

13 We na lahú se, na jism kí khwáhish se, na mard kí khwáhish se, magar Khudá se paidá húe hain.

14 Aur Kalám mujassam húá, aur wuh fazl aur rástí se bharpu'r hoke hamáre darmiyán rahá, aur ham ne us ká aisá jalál dekhá, jaisá Báp ke eklauté ká jalál.

15 ¶ Yuhanná ne us kí bábat gawáhí dí, aur pukárke kahá, Yih wuhí hai jis ká zikr main kartá thá, ki wuh jo mere píchhe ánewálá hai mujh se muqaddam hai; kyúnki wuh mujh se pahle thá.

16 Aur us kí bharpu'r se ham sab ne páyá, balki fazl par fazl.

17 Kyúnki sharí'at Músá kí ma'rifat se dí gaí, magar fazl aur sachái Yisú' Masíh se pahunchí.

18 Khudá ko kisí ne kabhí na dekhá, eklautá Betá jo Báp kí god men hai, usí ne batlá diyá.

19 ¶ Aur Yuhanná kí gawáhí yih thí, jab ki Yahúdión ne Yarúsalam se káhinon, aur Láwíon ko bhejá, ki us se púchhen, kí Tú kaun hai?

20 Aur us ne iqrár kiyá, aur inkár na kiyá; balki iqrár kiyá, ki Main Masíh nahín hún.

21 Tab unhon ne us se púchhá, To aur kaun? Kyá tú Iliyás hai? Us ne kahá, Main nahín hún. Pas, áyá tú wuh nabí hai? Us ne jawáb diyá, Nahín.

22 Tab unhon ne us se kahá, ki Tú kaun hai? taki ham unhen jinthon ne ham ko bhejá, koí jawáb den. Tú apne haqq men kyá kahtá hai?

23 Us ne kahá ki Main, jaisá Yas'ayiáh nabí ne kahá, bayábán men ek pukárnewále kí áwáz hún, ki Tum Khudáwand kí ráh ko durust karo.

24 Aur ye jo bheje ga,e the, Farísíon men se the.

25 Aur unhon ne us se suwál kiyá, aur kahá, ki Agar tú na Masíh hai, na Iliyás, aur na wuh nabí, pas kyún baptisma detá hai?

26 Yuhanná ne jawáb men unhen kahá, ki Main pání se baptisma detá hún: par tumháre darmiyán ek khaṛá hai, jise tum nahín jánte;

27 Yih wuhí hai, jo mere píchhe ánewálá thá, aur mujh se muqaddam thá, jis kí jútí ká tasma main kholne ke láiq nahín hún.

28 Yih báten Bait-'abara men Yordan ke pár, jahán Yuhanná baptisma detá thá, wáqi' húún.

29 ¶ Dúsre din Yuhanná ne Yisú' ko apne pás áte dekhá, aur kahá, Dekho, Khudá ká Barra, jo jahán ká gunáli ut्थá le játá hai!

30 Yih wuhí hai, jis ke haqq men main ne kahá, ki Ek mard mere píchhe átā hai, jo mujh se muqaddam thá, kyúnki wuh mujh se pahle thá.

31 Aur main to use na jántá thá: par is liye main pání se baptisma detá áyá, taki wuh Isráel par záhir ho.

32 Aur Yuhanná ne yih kahke gawáhí dí, ki Main ne Rúh ko kabútar kí tarah ásmán se utarte dekhá, aur wuh us par thahri.

33 Aur main use na jántá thá: par jis ne mujhe bhejá, ki pání se baptisma dún, us ne mujhe kahá, ki Jis par tú Rúh ko utarte, aur thaharte dekhe, wuh wuhí hai, jo Rúh i Quds se baptisma detá hai.

34 So main ne dekhá aur gawáhí dí, ki yihí Khudá ká Betá hai.

35 ¶ Phir dúsre din Yuhanná aur do us ke shágirdon men se khaṛé the;

36 Tab Yuhanná ne Yisú' ko chalte dekhkar kahá, Dekho, Khudá ká Barra!

37 Aur un do shágirdon ne us ká kalám suná, aur Yisú' ke píchhe ho lí,e.

38 Tab Yisú' ne munh pherke

aur unhen píchhe áte dekhkar un ko kahá, Tum kyá dhúndh te ho? Unhon ne us se kahá, Ai Rabbí, (jis ká tarjuma yih hai, ai Ustád), tú kahán rahtá hai?

39 Us ne unhen kahá, Chalo, dekho. Pas we á,e, aur jahán wuh rahtá thá dekhá, aur us roz us ke sáth rahe; aur yih daswín sá'at ke qarib thá.

40 Ek un donoñ men se jinhan ne Yuhanná kí suní aur us ke píchhe ho lí,e Shama'ún Patras ká bháí Andryás thá.

41 Us ne pahle apne bháí Shama'ún ko páyá; aur us se kahá, ki Ham ne Masih ko, jis ká tarjuma Kristus hai, páyá.

42 Tab wuh use Yisú' pás láyá, aur Yisú' ne us par nigáh karke kahá, ki Tú Yúnas ká betá Shama'ún hai: tú Kefás kahláwegá, jis ká tarjuma Patthar hai.

43 ¶ Dúsre din Yisú' ne cháhá, ki Galil men jáwe; par Failbús ko páke kahá, Mere píchhe chal.

44 Aur Failbús Baitsaidá ká, jo Andryás aur Patras ká shahr hai, báshinda thá.

45 Failbús ne Nathanáel ko páyá, aur kahá, ki Jis ká zikr Músá ne tauret men, aur nabion ne kiyá hai, ham ne use páyá, wuh Yúsuf ká betá Yisú' Násarí hai.

46 Nathanáel ne us se kahá, Kyá Násarat se koí achchhí chiz nikal saktí hai? Failbús ne kahá, Á, dekh.

47 Yisú' ne Nathanáel ko apní taraf áte dekhkar us ke haqq men kahá, Dekho sachchá Isráelí, jis men makr nahín hai!

48 Nathanáel ne us se kahá, Tú mujhe kahán se jántá hai? Yisú' ne jawáb diyá, aur use kahá, Us se pahle ki Failbús ne tujhe buláyá, jab tú anjír ke darakht tale thá, main ne tujhe dekhá.

49 Nathanáel ne jawáb men us se kahá, Ai Rabbí, tú Khudá ká Betá, tú Isráel ká bádsháh hai!

50 Yisú' ne jawáb diyá, Kyá tú is liye ímán látá hai, ki maiñ ne

tujh se kahá, ki maiñ ne tujh ko anjír ke darakht tale dekhá? tú in se bare májare dekhégá.

51 Phir us ne kahá, Maiñ tum se sach sach kahtá hún, ki Ab se tum ásmán ko khulá aur Khudá ke firishton ko úpar játe aur Ibn i Ádam par utarte dekhoge.

II BÁB.

1 AUR tísre din Káná e Galil men kisí ká byáh húa; aur Yisú' kí má wahán thí.

2 Aur Yisú' aur us ke shágir-don kí bhí us byáh men da'wat thí.

3 Aur jab mai ghat ga,i, Yisú' kí má ne us se kahá, ki Un ke pás mai na rahí.

4 Yisú' ne us se kahá, ki Ai mastúra, mujhe tujh se kyá kám? merá waqt hanoz nahín áyá.

5 Us kí má ne khádimon ko kahá, Jo kuchh wuh tumhen kahe, karo.

6 Aur wahán patthar ke chha maṭke tahárat ke liye Yahúdión ke dastúr ke muwáfiq dhare the, aur har ek men do yá tín man kí samái thí.

7 Yisú' ne unhen kahá, Maṭkon men pání bharo. So unhon ne un ko labálab bhará.

8 Phir us ne unhen kahá, ki Ab nikálo, aur majlis ke sardár pás le jáo. Aur we le ga,e.

9 Jab mír i majlis ne wuh pání, jo mai ban gayá thá, chakhá, aur nahín jána, ki yih kahán se thá, magar chákar, ki jinhan ne wuh pání nikálá thá, jánte the, to mír i majlis ne dulhe ko buláyá, aur kahá, ki,

10 Har shakhs pahle achchhí mai kharch kartá hai, aur náqis, us waqt ki jab píke chhak ga,e: par tú ne achchhí mai ab tak rakh chhorí hai.

11 Yih pahlá mu'ajiza Yisú' ne Káná e Galil men dikháyá, aur apná jalál záhir kiyá, aur us ke shágird us par ímán lá,e.

12 ¶ Ba'd us ke, wuh, aur us kí má, aur us ke bháí, aur shágird Kafarnáhum men ga,e; par wahán bahut dinon tak maqám na kiyá.

13 ¶ Tab Yahúdión kí 'íd i fasah nazdík thí, aur Yisú' Yarúsalam ko gayá.

14 Aur haikal men, bail, aur bher, aur kabútar faroshon ko, aur sarráfon ko baiṭhe húe páyá:

15 Tab us ne rassí ká korá banáke, un sab ko, bheron aur bailon samet, haikal se nikál diyá, aur sarráfon ke ṭake bikhrá dí,e, aur taḳhṭe ullaṭ dí,e;

16 Aur kabútar faroshon ko kahá, In chízon ko yahán se le já: mere Báp ke ghar ko byopár ká ghar mat banáo.

17 Aur us ke shágirdon ko yád áyá, ki yún likhá hai, ki Tere ghar kí gairat mujhe khá ga,i.

18 ¶ Tab Yahúdión ne jawáb men use kahá, Kyá nishán tú hamen dikhátá hai, jo yih kám kartá hai?

19 Yisú' ne jawáb dekar unheṇ kahá, ki Is haikal ko dhá do, aur main use tín din men khará karungá.

20 Yahúdión ne kahá, Chhiyálís baras se yih haikal ban rahí hai, aur tú use tín din men khará karegá?

21 Par us ne apne badan kí haikal kí bábat kahá thá.

22 Is liye, jab wuh murdon men se jí uthá, to us ke shágirdon ko yád áyá, ki us ne yih kahá thá: aur we kitáb aur Yisú' ke kalám par ímán lá,e.

23 ¶ Aur jab ki wuh Yarúsalam ke bich 'íd i fasah men thá, to bahutere, un mu'ajizon ko, jo us ne dikhá,e, dekhke, us ke nám par ímán lá,e.

24 Lekin Yisú' ne apne taín un par na chhorá, is liye ki wuh sab ko jántá thá.

25 Aur muhtáj na thá, ki koí insán ke haqq men gawáhí de: kyúnki wuh áp, jo kuchh ki insán men thá, jántá thá.

III BÁB.

1 FARÍSÍÓN men se ek shakhs Niqúdemús nám Yahúdión ká ek sardár thá:

2 Us ne rát ko Yisú' pás ákar kahá, ki Ai Rabbí, ham jánte hain, ki tú Khudá kí taraf se ustád hoke áyá: kyúnki koí yih mu'ajize jo tú dikhátá hai, jab tak ki Khudá us ke sáth na ho, nahín dikhá saktá.

3 Yisú' ne jawáb dekar us se kahá, Main tujh se sach sach kahtá hún, Agar koí sar i nau paidá na ho, to wuh Khudá kí bádhsháhat ko dekh nahín saktá.

4 Niqúdemús ne us se kahá, Ádmí jab búrhá ho gayá, to kyúnkar paidá ho saktá hai? kyá us men yih táqat hai, ki dobára apní má ke peṭ men dar á,e, aur paidá howe?

5 Yisú' ne jawáb diyá, ki Main tujhé sach sach kahtá hún, Agar ádmí pání aur Rúh se paidá na howe, to wuh Khudá kí bádhsháhat men dákhil ho nahín saktá.

6 Jo jism se paidá húá hai, jism hai, aur jo Rúh se paidá húá hai, Rúh hai.

7 Ta'ajjub na kar, ki Main ne tujhé kahá, ki Tumheṇ sar i nau paidá honá zarúr hai.

8 Hawá jidhar cháhtí hai, chaltí hai, aur tú us kí áwáz suntá hai, par nahín jántá, ki wuh kahán se átí, aur kahán ko játí hai: har ek jo Rúh se paidá húá aisá hí hai.

9 Niqúdemús ne jawáb men us se kahá, Yih báten̄ kyúnkar ho saktí hain?

10 Yisú' ne jawáb diyá, aur us se kahá, Kyá tú Baní Isráel ká ustád hai, aur yih báten̄ nahín jántá?

11 Main tujhé sach sach kahtá hún, ki Jo ham jánte hain, kahte hain, aur jise ham ne dekhá hai, us par gawáhí dete hain: aur tum hamári gawáhí qabúl nahín karte.

12 Jab main ne tumhen zamín kí báten kahín, aur tum yaqín nahín karte, phir agar main tumhen ásmán kí báten kahún, to tum kyúnkar yaqín karoge?

13 Koí ásmán par nahín gayá, siwá us shakhs ke jo ásmán par se utrá, ya'ne Ibn i Ádam, jo ásmán par hai.

14 ¶ Aur jis tarah Músá ne sámp ko bayábán men bulandí par rakhá, usí tarah se zarúr hai, ki Ibn i Ádam bhí uṭhayá jáe;

15 Táki jo koí us par ímán láwe, halák na howe, balki hamesha kí zindagí páwe.

16 ¶ Kyúnki Khudá ne jahán ko aisá piyár kiyá hai, ki us ne apná iklautá Beṭá baḥkshá, táki jo koí us par ímán láwe, halák na ho, balki hamesha kí zindagí páwe.

17 Kyúnki Khudá ne apne Beṭe ko jahán men is liye nahín bhejá, ki jahán par sazá ká hukm kare, balki is liye, ki jahán us ke sabab naját páwe.

18 ¶ Jo us par ímán látá, us ke liye sazá ká hukm nahín: lekin jo us par ímán nahín látá, us ke wáste sazá ká hukm ho chuká; kyúnki wuh Khudá ke iklauté Beṭe ke nám pár ímán na láyá.

19 Aur sazá ke hukm ká sabab yih hai, ki nür jahán men áyá, aur insán ne tárikí ko nür se zi-yáda piyár kiyá; kyúnki un ke kám bure the.

20 Kyúnki jo koí burá kartá hai, wuh nür se dushmaní rakhtá hai, aur nür ke pás nahín átá, tá aisá na ho, ki us ke kám záhir howen.

21 Par wuh jo haqq kartá hai, nür ke pás átá hai, táki us ke kám záhir howen, ki we Khudá kí marzí se hain.

22 ¶ Ba'd un báton ke, Yisú' aur us ke shágird Yahúdiya kí sarzamín men á,e; aur wuh wahán chande un ke sáth rahá, aur baptisma detá thá.

23 ¶ Aur Yuhanná bhí Sálím ke

garíb 'Ainon men baptisma detá thá, kyúnki wahán pání bahut thá, aur log á,e aur baptisma páyá.

24 Ki Yuhanná hanoz qaidkháne men dálá na gayá thá.

25 ¶ Tab Yuhanná ke shágirdon aur Yahúdion ke darmiyán, tahárat kí bábat, bahs huú.

26 Aur we Yuhanná pás á,e, aur us se kahá, ki Ai Rabbi, wuh jo Yardan ke pár tere sáth thá, jis par tú ne gawáhí dí, dekh, ki wuh baptisma detá hai, aur sab us ke pás áte hain.

27 Yuhanná ne jawáb diyá, aur kahá ki Koí insán kisí chíz ko magar jis hál ki wuh use ásmán se dí jáwe, pá nahín saktá.

28 Tum khud mere gawáh ho, ki main ne kahá, ki Main Masih nahín, magar us se áge bhejá huá hún.

29 Jis kí dulhin hai, wuh dulhá hai, par dulhe ká dost jo khará hai, aur us kí suntá hai, dulhe kí áwáz se bahut khush hotá hai: pas merí yih khushí púrí húí.

30 Zarúr hai, ki wuh barhe, par main ghaṭún.

31 Wuh, jo úpar se átā hai, sab ke úpar hai: wuh jo zamín se hai, zamíní hai, aur zamín kí kahtá hai: wuh jo ásmán se átā hai, sab ke úpar hai.

32 Aur jo kuchh us ne dekhá aur suná hai, us kí gawáhí detá hai, aur koí shakhs us kí gawáhí qabúl nahín kartá.

33 Jis ne us kí gawáhí qabúl kí hai, muhr kí hai, ki Khudá sach-chá hai.

34 Kyúnki jise Khudá ne bhejá hai, wuh Khudá kí báten kahtá hai, kyúnki Khudá paimáish karke Rúh nahín detá.

35 Báp Beṭe ko piyár kartá hai, aur sab chízen us ke háth men dí hain.

36 Jo ki Beṭe par ímán látá hai, hamesha kí zindagí us kí hai: aur jo Beṭe par ímán nahín látá, hayát ko na dekhegá, balki Khudá ká qahr us par rahtá hai.

IV BÁB.

AUR jab Khudáwand ne jáná, ki Farísíon ne suná, ki Yisú' Yuhanná se ziyáda shágird kartá hai, aur baptisma detá hai,

2 Hálánki Yisú' áp nahín, balki us ke shágird baptismा dete the.

3 Tab wuh Yahúdiya ko chhoरke Galíl ko phir gayá.

4 Aur zarúr thá ki wuh Sámariya se hoke jáwe.

5 Tab wuh Sámariya ke ek shahr men jo Súkár kahlátá hai, us milkýat ke nazdík, jo Ya'qíb ne apne bete Yúsuf ko dí thí, áyá.

6 Aur Ya'qíb ká kúá wahín thá. Chunánchi Yisú' safar se mánnda hoke us kúe par yún hí baihá. Yih chhaṭhí gharí ke qaríb thá.

7 Tab Sámariya kí ek 'aurat pání bharne á.i. Yisú' ne us se kahá, Mujhe pine ko de.

8 Kyúnki us ke shágird shahr men ga,e the, ki kuchh kháne ko mol len.

9 Sámariya kí us 'aurat ne use kahá, ki Kyúnkar tú, jo Yahúdí hai, mujh se, jo Sámariya kí 'aurat hún, pání pine ko mánktá hai? Kyúnki Yahúdí Sámaríon se suhbat nahín rakhte the.

10 Yisú' ne jawáb men us se kahá, Agar tú Khudá kí bakhsish ko, aur us ko jo tujh se kahtá hai, Mujhe pání de, pahchántí, ki wuh kaun hai, to tú us se mánktí, aur wuh tujhe jítá pání detá.

11 'Aurat ne us se kahá, Ai Khudáwand, tujh pás pání khainchne ko kuchh nahín, aur kúá gahrá hai: phir tú ne wuh jítá pání kahán se páyá?

12 Kyá tú hamáre báp Ya'qíb se jis ne ham ko yih kúá diyá, aur khud us ne, aur us ke laṛkon ne aur us ke chárpáyon ne us se piyá, baṛá hai?

13 Yisú' ne jawáb diyá, aur us

se kahá, Jo koí yih pání píe, phir piyásá hogá:

14 Par jo koí wuh pání jo main use dúngá, píe, wuh kabhí piyásá na hogá: balki jo pání main use detá hún, us men pání ká sotá ho jáegá, jo hamesha kí zindagí tak jári rahegá.

15 'Aurat ne us se kahá, Ai Khudáwand, yih pání mujh ko dé, ki main piyásí na hún, aur na bharne ko yahán áún.

16 Yisú' ne us se kahá, Jáke apne shauhar ko bulá, aur yahán á.

17 'Aurat ne jawáb diyá aur kahá ki, Main be-shauhar hún. Yisú' ne us se kahá, ki Tú ne durnst kahá, ki Main be-shauhar hún:

18 Kyúnki tú páneḥ khasam kar chukí hai, aur wuh jo ab tú rakhtí hai, terá khasam nahín; tú ne yih sach kahá.

19 'Aurat ne us se kahá, Ai Khudáwand, mujhe ma'lum hotá hai, ki áp nabí hain.

20 Hamáre bápdádon ne is pahár par parastish kí; aur tum kahte ho, ki wuh jagah jahán parastish karní cháhiye, Yárúsalam men hai.

21 Yisú' ne us se kahá, ki Ai aurat, merí bát ko yaqín rakh, ki wuh waqt átā hai, ki tum na to is pahár par aur na Yárúsalam men Báp kí parastish karoge.

22 Tum us kí, jise nahín jánte ho, parastish karte ho: ham us kí, jise jánte hain, parastish karte hain: kyúnki naját Yahúdión men se hai.

23 Par waqt átā hai, balki abhí hai, ki sachche parastár rúh aur rástí se Báp kí parastish karenge, kyúnki Báp aise parastáron ko cháhtá hai.

24 Khudá rúh hai, aur us ke parastáron ko farz hai, ki rúh aur rástí se us kí parastish karen.

25 'Aurat ne us se kahá, Main jántí hún, ki Masíh (jis ká tarjuma Kristus hai,) átā hai; jab wuh áwegá, to hamen sab báton kí khabar degá.

26 Yisú' ne us se kahá, Main, jo tujh se boltá hún, wuhí hún.

27 ¶ Itne men us ke shágird á,e, aur ta'ajjub kiyá, ki wuh 'aurat se báten kartá thá; par kisi ne na kahá, ki Tú kyá cháhtá hai, yá Us se kis liye báten kartá hai?

28 Tab 'aurat ne apná ghařá chhorá, aur shahr men jáke logon se kahá,

29 Áo, ek mard ko dekho, jis ne sab kám jo main ne kí,e mujhe kahe: kyá yih Māsíh nahín?

30 We shahr se nikle, aur us pás á,e.

31 ¶ Is 'arse men, us ke shágir-don ne us se darkhwást karke kahá, ki Ai Rabbí, kuchh kháiye.

32 Lekin us ne kahá, Mere pás kháne ke liye ķurák hai jise tum nahín jánte.

33 Is liye shágirdon ne ápas men kahá, ki Kyá koí us ke liye kháná láyá hai?

34 Yisú' ne unheñ kahá, Merá kháná yih hai, ki apne bhejne-wále kí marzí bajá láun, aur us ká kám púrá karún.

35 Kyá tum nahín kahte, ki Chár mahíne ke ba'd fasl átí? dekho, maiñ tum se kahtá hún, Apní áñkhen uṭháo, aur kheton ko dekho, ki we kátné ke liye pak chuke hain.

36 Aur kátnewálá mazdúrí páta hai, aur hamesha kí zindagi ke liye mewa jam'a kartá hai, táki wuh jo botá hai, aur wuh jo káttá hai, donoñ báham ķush howen.

37 Aur us par yih masal ṭhík átí hai, ki Ek botá hai, aur dúsrá káttá hai.

38 Main ne tumheñ bhejá hai, táki use jis men tum ne mihnat nahín kí, káto: gair logon ne mihnat kí, aur tum un kí mihnat men dákhil húe.

39 ¶ Aur us shahr ke bahut se Sámarí us 'aurat ke kahne se, jis ne gawáhí dí, ki Us ne sab kuchh jo maiñ ne kiyá hai, mujhe kahá, us par ímán lá,e.

40 Aur un Sámaríon ne us pás

áke us kí minnat kí, ki hamáre sáth rah: chunánchi wuh do roz wahán rahá.

41 Aur un ke siwá aur ba-hutere usí ke kalám ke sabab ímán lá,e;

42 Aur us 'aurat ko kahá, Ab ham faqat tere kahne se ímán nahín late; kyúnki ham ne khud suná, aur jánte hain, ki yih filha-qíqat jahán ká naját denewálá Masíh hai.

43 ¶ Aur wuh do roz ba'd wa-hán se rawána hokar Galíl ko gayá; ki

44 Yisú' ne khud gawáhí dí, ki nabí apne watan men 'izzat nahín páta.

45 Aur jab wuh Galíl men áyá, to Galílion ne us kí khátirdári kí, ki sab kámon ko jo us ne Yarúsalam ke bích 'íd men kí,e the, dekhá thá; kyúnki we bhí 'íd men ga,e the.

46 Aur Yisú' phir Káná e Galíl men, jahán us ne pání ko mai banáyá thá, áyá. Aur bádsháh ká ek mulázim thá jis ká betá Kafarnáhum men bímár thá.

47 Jab suná, ki Yisú' Yahúdiya se Galíl men áyá, us pás gayá, aur us kí minnat kí, ki áwe, aur us ke bete ko changá kare: kyúnki wuh marne par thá.

48 Tab Yisú' ne use kahá, Agar tum nisháníán aur karámateñ na dekhoge, to ímán na láoge.

49 Bádsháh ke mulázim ne us se kahá, Ai Khudáwand, peshtar us se, ki merá betá mar jáwe, utar á.

50 Yisú' ne use kahá, Já, terá betá jítá hai. Aur us mard ne us bát ká, jo Yisú' ne use kahí, i'atiqád kiyá, aur chalá gayá.

51 Aur wuh ráh hí men thá, ki us ke naukar use mile, aur kha-bar pahuncháí ki Terá betá jítá hai.

52 Tab us ne un se púchhá, ki Use kis waqt se áram hone lagá? Unhoñ ne kahá, ki Kal sátwín ghaří us kí tap játí rahí.

53 Tab báp ne jáná, ki wuhí ghaří thí, jab Yisú' ne us se kahá thá, ki Terá betá jítá hai. Aur wuh khud, aur us ká sárá ghar ímán láyá.

54 Yih dúsrá mu'ajiza hai, jo Yisú' ne Yahúdiya se Galíl men áke dikhláyá.

V BÁB.

1 **B**A'D us ke Yahúdión kí ek 'íd thí, aur Yisú' Yarúsalam ko gayá.

2 Aur Yarúsalam men bher-darwáze ke pás ek hauz hai, jo 'Ibráni men Bait i Hasdá kahlátá hai; us ke páñch usáre hain.

3 Un men nátañánon, aur andhon, aur langron, aur pazhmurdon kí ek barí bhír parí thí, jo páñi ke hilne kí muntazir thí.

4 Kyúnki ek firishta ba'ze waqt us hauz men utarke páñi ko hilátá thá, aur páñi ke hilne ke ba'd jo koí ki pahle us men utartá, kaisí hí bímárí men kyún na ho, us se changá ho játá thá.

5 Aur wahán ek shakhs thá, jo ahtís baras se bímár thá.

6 Yisú' ne jab use paře hué dekhá, aur jáná, ki wuh barí muddat se us hálat men hai, to us se kahá, ki Kyá tú cháhtá hai ki changá hojáe?

7 Bímár ne use jawáb diyá, ki Ai Khudáwand, mujh pás ádmí nahín, ki jab yih páñi hile, to mujhe hauz men dál de: aur jab tak maiñ áp se áún, dúsrá mujh se pahle utar partá hai.

8 Yisú' ne use kahá, Uth, aur apná khaṭolá uṭhákar chalá já.

9 Wonhín wuh shakhs changá ho gayá, aur apná khaṭolá uṭhá liyá, aur chalá gayá: aur wuh sabt ká din thá.

10 ¶ Is liye Yahúdión ne use, jo changá húá thá, kahá, ki Yih sabt ká roz hai; tujhe rawá nahín, ki khaṭole ko uṭhá le jáwe.

11 Us ne unhen jawáb diyá, ki jis ne mujhe changá kiyá, usí

ne mujhe farmáyá, ki apná khaṭolá uṭháke chalá já.

12 Tab unhon ne us se púchhá, ki wuh kaun shakhs hai jis ne tujhe kahá, Apná khaṭolá uṭháke chalá já?

13 Us ne, jo changá húá thá, na jáná, ki wuh kaun hai, is liye ki Yisú' wahán se tal gayá thá, kyúnki us jagah men bhír thí.

14 Ba'd us ke, Yisú' ne use haikal men páyá, aur us se kahá, ki Dekh tú changá ho gayá, phir gunáh na karná, na howe ki tú us se badtar balá men paře.

15 Wuh shakhs rawána húá, aur Yahúdión ko ittilá dí, ki jis ne mujhe changá kiyá, Yisú' hai.

16 Is liye Yahúdión ne Yisú' ko satáyá, aur us ke qatl kí ghát men lage: kyúnki us ne yih kám sabt ke roz kiyá.

17 ¶ Lekin Yisú' ne unhen jawáb diyá, ki Merá Báp ab tak kám kiyá kartá hai, aur maiñ bhí kám kiyá kartá hún.

18 Tab Yahúdión ne aur bhí ziyáda us ko qatl karne cháhá; kyúnki us ne na faqat sabt hí ko na máná, balki Khudá ko apná Báp kahke apne taín Khudá ke barábar kiyá.

19 Tab Yisú' ne jawáb diyá aur kahá, Main tum se sach sach kahtá hún, ki Betá áp se kuchh nahín kar saktá, magar wuh, jise Báp ko karte dekhe; kyúnki jo kuchh ki wuh kartá hai, Betá bhí usí tarah se kartá hai.

20 Is liye ki Báp Beté ko piyár kartá hai, aur jo kám ki khud kartá hai, use dikhátá hai: aur wuh un se bare kám use dikháegá, ki tum ta'ajjub karoge.

21 Is liye ki jis tarah Báp murdon ko uthátá hai, aur jilátá hai, Betá bhí jinhen cháhtá hai jilátá hai.

22 Kyúnki Báp kisí shakhs kí 'adálat nahín kartá, balki us ne sári 'adálat Beté ko somp dí hai:

23 Táki sab Beté kí 'izzat karen,

jis tarah se ki Báp kí izzat karte hain. Jo Beṭe kí izzat nahín kartá, Báp kí, jis ne use bhejá hai, izzat nahín kartá.

24 Main tum se sach sach kahtá hún, Wuh jo merá kalám suntá hai, aur us par, jis ne mujhe bhejá hai, ímán látá hai, hamesha kí zindagí us kí hai, aur us par sazá ká hukm nahín, balki maut se guzarke wuh zindagí men pahunchá hai.

25 Main tum se sach sach kahtá hún, ki Wuh waqt átā hai, aur ab hai, ki murde Khudá ke Beṭe kí áwáz sunenge, aur we jo sunen jinge.

26 Kyúnki jis tarah Báp áp men zindagí rakhtá hai, usí tarah us ne Beṭe ko bhí diyá hai, ki apne men zindagí rakhe;

27 Balki use ikhtiyár diyá hai, ki 'adálat kare, is liye ki wuh Ibn i Ádam hai.

28 Is se ta'ajjub na karo, kyúnki wuh waqt átā hai, jis men we sab, jo qabron men hain, us kí áwáz sunenge,

29 Aur niklenge; jin hon ne nekí kí hai, zindagí kí qiyámat ke wáste, aur jin hon ne badí kí hai, sazá kí qiyámat ke liye.

30 Main áp se kuchh kar nahín saktá: jaisá maiñ suntá hún, hukm kartá hún: aur merí 'adálat durust hai; kyúnki apní marzí ko nahín, par Báp kí marzí ko, jis ne mujhe bhejá, cháhtá hún.

31 Agar maiñ apne liye gawáhí dún, to merí gawáhí haqq nahín.

32 ¶ Dúsla hai, jo mere liye gawáhí detá hai, aur maiñ jántá hún, ki wuh gawáhí, jo mere liye detá hai, haqq hai.

33 Tum ne Yuhanná ke pás payám bhejá, aur us ne haqq par gawáhí dí.

34 Lekin maiñ insán kí gawáhí nahín cháhtá, par maiñ yih báten kahtá hún, taki tum naját páo.

35 Wuh jaltá aur chamaktá chirág thá, aur tum cháhte the,

ki thorí der tak us ke nûr se khush raho.

36 ¶ Lekin mujh pás Yuhanná kí gawáhí se ek barí gawáhí hai: is liye ki yih kám jo Báp ne mujhe sompe hain, taki púre karún, ya'ne yih kám jo main kartá hún, mere liye gawáhí dete hain, ki Báp ne mujhe bhejá hai.

37 Aur Báp, jis ne mujhe bhejá hai, us ne áp mere liye gawáhí dí hai. Tum ne kabhi us kí áwáz nahín suní, aur na us kí súrat dekhí.

38 Aur tum us ká kalám apne dilon men nahín rakhte; kyúnki tum us par, jise us ne bhejá, ímán nahín láte.

39 ¶ Nawishton men dhúnho: kyúnki tum gumán karte ho, ki un men tumháre liye hamesha kí zindagí hai; aur yih wuhí hain, jo mere liye gawáhí dete hain.

40 Aur tum nahín cháhte, ki mujh pás áo, taki zindagí páo.

41 Main us buzurgí ko, jo insán kí taraf se hotí, manzúr nahín kartá.

42 Main tumhen jántá hún, ki tum men Khudá kí muhabbat nahín.

43 Maiñ apne Báp ke nám se áyá hún, aur tum mujhe qabúl nahín karte; agar koí dúsra apne nám se áwe, to tum use qabúl karoge.

44 Tum jo ápas men ek dúsre kí izzat cháhte ho, aur wuh izzat, jo sirf Khudá se hai, nahín dhún-dhte, kyúnkar ímán lá sakte ho?

45 Gumán mat karo, ki maiñ Báp ke pás tumhári faryád karúngá: ek to hai tumhári faryád karnewálá, ya'ne Músá, jis par tumhárá bharosá hai.

46 Kyúnki agar tum Músá par ímán láte, to mujh par bhí ímán láte, is liye ki us ne mere haqq men likhá hai.

47 Lekin jis hál ki tum us ke nawishton ko yaqín na karoge, to merí báton ko kyúnkar yaqín karoge?

VI BÁB.

1 YISÚ' un báton ke ba'd Galíl ke daryá ke pár, jo daryá e Tiberiyás hai, gayá.

2 Aur ek barí bhír us ke píchhe ho lí, kyúnki unhon ne us ke mu'ajize, jo us ne bímáron par dikháe, dekhe the.

3 Phir Yisú' pahár par gayá, aur wahán apne shágirdon ke sáth baiṭhá.

4 Aur Yahúdion kí 'íd i fasah nazdik thí.

5 ¶ Phir jab Yisú' ne ánkhen uthá, in aur dekhá, ki barí bhír mere pás átí hai, to Failbús se kahá, ki Ham kahán se in ke liye rotián kharíden?

6 Par us ne yih, imtihán kí ráh se, kahá thá, kyúnki wuh áp jántá thá jo kiyá cháhtá thá.

7 Failbús ne use jawáb diyá, ki do sau dínár kí rotián un ke liye bas na hongí, ki un men se har ek thorá sá páwe.

8 Ek ne us ke shágirdon men se, jo Shama'ún Patras ká bháí Andryás thá, us se kahá,

9 Yahán ek chhokre ke pás jau kí páñch rotián, aur do chhotí machhlíán hain, par yih itne logon men kyá hain?

10 Tab Yisú' ne kahá, ki Logon ko bitháo. Aur us jagah bahut ghás thí. So gintí men tañhminán páñch hazár mard baiṭhe.

11 Aur Yisú' ne rotián uthá lín, aur shukr karke, shágirdon ko dín, aur shágirdon ne, unhen jo baithé the, bántín; aur isí tarah machhlíón men se, jis qadr ki we cháhte the.

12 Aur jab we ser ho chuke, to us ne apne shágirdon se kahá, ki Un tukron ko jo bach rahe hain jam'a karo, táki kuchh kharáb na howe.

13 Chunánchi unhon ne jam'a kí, e, aur jau kí páñch rotión ke tukron se, jo un khánewálon se

bach rahe the; bárah tokrián bharín.

14 Tab un logon ne, yih mu'a-jiza jo Yisú' ne dikháyá, dekhkar kahá, Filhaqíqat wuh nabí jo jahán men ánewálá thá yihi hai.

15 ¶ Pas Yisú' ne ma'lum karke, ki we cháhte hain ki áwen, aur use zabardastí pakaṛke bádsháh karen, áp akelá pahár ko phir gayá.

16 Aur jab shám húí, to us ke shágird daryá pás ga,e;

17 Aur kishtí par chāṛhke daryá pár Kafarnáhum ko chale. Us waqt andherá ho chalá thá, aur Yisú' un pás na áyá thá.

18 Aur ándhí ke sabab daryá lahráne lagá.

19 Aur jab we qarib pachís yá tís tır partáb ke nikal ga,e the, unhon ne Yisú' ko daryá par chalte, aur kishtí ke qarib áte dekhá, aur dar ga,e.

20 Tab us ne unhen kahá, ki Maiñ húñ, daro mat.

21 Phir unhon ne khushí se use kishtí par le liyá, aur kishtí filsaur us jagah par, jahán we játe the, já pahunchí.

22 ¶ Dúsre din, jab bhír ne, jo daryá ke us pár khaṛí thí, yih dekhá, ki wahán siwá us ek ke, jis par us ke shágird chāṛh baithé the, koí dúsri kishtí na thí, aur yih ki Yisú' apne shágirdon ke sáth us kishtí par na gayá thá, ballki sirf us ke shágird ga,e the;

23 (Par aur kishtíán Tiberiyás se us jagah ke nazdik, jahán unhon ne Khudáwand ke shukr ke ba'd rotí khái thí, ám).

24 Pas jab us bhír ne yih dekhá hai ki, wahán na Yisú', aur na us ke shágird hain, to we kishtíon par chāṛhe, aur Yisú' kí talásh men Kafarnáhum ko á,e.

25 Aur unhon ne use daryá pár páke us se kahá, ki Ai Rabbi, tú yahán kab áyá?

26 Yisú' ne unhen jawáb diyá, ki Maiñ tum se sach sach kahtá

hún, ki Tum mujhe dhúndhte ho, is liye ki tum ne mu'ajize dekhe, so nahín, balki is liye ki tum rotián kháke ser hué.

27 Fání khurák ke liye nahín, balki us kháne ke liye mihnat karo, jo hamesha kí zindagí tak thahartá hai, ki Ibn i Ádam wuh tumhen degá; kyúñki Báp ne jo Khudá hai, us par muhr kar dí hai.

28 Tab unhoñ ne us se kahá, ki Ham kyá karen, taki Khudá ke kám bajá láwen?

29 Yisú' ne jawáb men unhen kahá, Khúda ká kám yih hai, ki tum us par jise us ne bhejá ímán láo.

30 Tab unhon ne us se kahá, Pas tú kaun sá nishán dikhátá hai, taki ham dekhke tujh pár ímán láwen? Tú kyá kartá hai?

31 Hamáre bápdádon ne bayábán men mann kháyá; chunánchi likhá hai, ki Us ne unheñ ásmán se rotí kháne ko dí.

32 Tab Yisú' ne unheñ kahá, Main tum se sach sach kahtá húñ, ki Músá ne tumhen ásmání rotí nahín dí, balki merá Báp tumhen sachchí ásmání rotí detá hai.

33 Is liye ki Khudá kí rotí wuh hai, jo ásmán se utartí, aur jahán ko zindagí bakhstí hai.

34 Tab unhoñ ne us se kahá, Ai Khudáwand, ham ko hamesha yih rotí diyá kar.

35 Yisú' ne unheñ kahá, Main zindagí kí rotí hún: jo mujh pás átā hai, hargiz bhúkhá na hogá: aur jo mujh par ímán látá hai, kabhí piyásá na hogá.

36 Lekin maiñ ne tumhen kahá hai, ki Tum ne to mujhe dekhá, par ímán nahín láe.

37 Har ek, jise Báp ne mujhe diyá hai, mujh pás áwegá, aur use jo mujh pás átā hai, maiñ hargiz nikál na dungá.

38 Kyúñki main ásmán par se is liye nahín utrá, ki apní marzí par, balki us kí marzí par chalúñ, jis ne mujhe bhejá hai.

39 Aur Báp jis ne mujhe bhejá hai, yih cháhtá hai, ki main un men se jo us ne mujhe dí, e hain, kísí ko na khoúñ, balki use ákhirí din phir utháúñ.

40 Aur jis ne mujhe bhejá hai, us kí marzí yih hai, ki har ek jo Beté ko dekhe, aur us par ímán láwe, hamesha kí zindagí páwe, aur main use ákhirí din men utháúngá.

41 Tab Yahúdí us par kurkuráé, is liye ki us ne kaha, Wuh rotí jo ásmán se utrí, main hún.

42 Aur kahá, Kyá yih Yisú' Yúsuf ká betá nahín, jis ke má báp ko ham jánte hain? phir wuh kyúñkar kahtá hai, ki Main ásmán se utrá hún.

43 Tab Yisú' ne jawáb men un ko kahá, ki Ápas men mat kurkuraó.

44 Koí shakhs mujh pás á nahín saktá, magar jis hál ki Báp jis ne mujhe bhejá hai, use khainch láwe, aur main use ákhirí din men utháúngá.

45 Nabíon ne yih likhá hai, ki We sab Khudá se ta'lím páwenge. Is liye har ek shakhs jis ne Báp se suná, aur sikhá hai, mujh pás átā hai.

46 Yih nahín hai ki kísí shakhs ne Báp ko dekhá hai, magar wuh jo Khudá kí taraf se hai, usí ne Báp ko dekhá hai.

47 Main tum se sach sach kahtá húñ, Jo mujh par ímán látá hai, hamesha kí zindagí usí kí hai.

48 Zindagí kí rotí maiñ hí hún.

49 Tumháre bápdádon ne bayábán men mann kháyá, aur mar gae.

50 Rotí jo ásmán se utartí hai, wuh hai, ki koi ádmí use kháke na mare.

51 Main hún wuh jítí rotí, jo ásmán se utrí: agar koí shakhs is rotí ko kháe, to abad tak jítá rahegá; aur rotí jo maiñ dungá, merá gosht hai, jo maiñ jahán kí zindagí ke liye dungá.

52 Tab Yahúdí ápas men bahs

karne lage, ki Yih mard apná gosht kyúñkar hamen̄ de saktá hai, ki kháen̄ ?

53 Tab Yisú' ne unheñ kahá, Main̄ tum se sach sach kahtá hún̄, Agar tum Ibn i Ádam ká gosht na kháo, aur us ká lahú na pio, to tum men zindagí nahín̄.

54 Jo koí merá gosht khátá hai, aur merá lahú pítá hai, hamesha kí zindagí usí kí hai, aur main̄ use ákhiri din uṭháúngá.

55 Kyúñki merá gosht filhaqí-qat kháne, aur merá lahú filhaqí-qat píne kí chíz hai.

56 Wuh jo merá gosht khátá, aur merá lahú pítá hai, mujh men̄ rahtá hai, aur main̄ us men.

57 Jis tarah se ki zinda Báp ne mujhe bhejá, aur main̄ Báp se zinda hún̄, isí tarah wuh bhí jo mujhe khátá hai, mujh se zinda hogá.

58 Wuh rotí jo ásmán se utrí, yih hai, na jaisá ki tumháre bápdáde mann kháke mar ga,e; wuh jo yih rotí khátá hai, abad tak jítá rahegá.

59 Us ne Kafarnáhum men̄ ta'llím dete húe 'ibádatkháne men̄ yih báten kahín̄.

60 Tab us ke shágirdon̄ men̄ se bahuton̄ ne sunke kahá, ki Yih sakht kalám hai, use kaun sun saktá hai ?

61 Yisú' ne az khud jáñkar ki us ke shágird ápas men̄ is bát par kuṛkuṛáte hain, unhen kahá, Kyá yih tum ko thokar ká bá'is hai ?

62 Pas agar tum Ibn i Ádam ko úpar játe, jahán wuh áge thá, dekhoge, to kyá hogá ?

63 Rúh hai wuh, jo jilátí hai ; jism se kuchh fáida nahín : yih báten jo main̄ tumhen kahtá hún̄, rúh hai, aur zindagí hai.

64 Par tum men̄ ba'ze hain, jo ímán nahín láte. Kyúñki Yisú' ibtidá se jántá thá, ki we jo ímán na láwenge, kaun hain̄, aur kaun use pakarwáegá.

65 Phir us ne kahá, Is liye main̄ ne tumhen kahá, ki koí shañhs,

siwá us ke, jise mere Báp kí taraf se 'ináyat húá, mujh pás nahín̄ á saktá.

66 ¶ Us waqt se us ke shágirdon̄ men̄ se bahutere ulte phir ga,e, aur ba'd us ke, us ke sáth na chale.

67 Tab Yisú' ne bárahon̄ ko kahá, Kyá tum bhí cháhkte ho, ki chale jáo ?

68 Shama'ún Patras ne use ja-wáb diyá, ki Ai Khudáwand, ham kis ke pás jáen ? hamesha kí zindagí kí báteñ to tere pás hain.

69 Aur ham to ímán lá,e hain, aur ján ga,e hain, ki tú zindá Khudá ká Betá Masíh hai.

70 Yisú' ne unheñ jawáb diyá, Kyá main̄ ne tum bárahon̄ ko nahín̄ chuná, aur ek tum men̄ se shaitán hai ?

71 Us ne Shama'ún ke bete Ya-húdá Iskariyútí kí bábat kahá : kyúñki wuhí us ko pakarwáne cháhktá, aur un bárahon̄ men̄ se thá.

VII BÁB.

1 **B**A'D us ke Yisú' Galíl men̄ sair kar rahá, ki Yahúdiya men̄ sair karná na cháhá, is liye ki Yahúdí us ke qatl kí fíkr men the.

2 Aur Yahúdión kí 'id i khíma nazdik á,i.

3 Tab us ke bháion̄ ne us se kahá, Yahán se rawána ho, aur Yahúdiya men̄ já, ki un kámon̄ ko, jo tú kartá hai, tere shágird bhí dekhen.

4 Kyúñki aisá koí nahín jo kuchh kám chhipke kare, aur cháhe ki áp mashhúr ho. Agar tú yih kám kartá hai, to apne taín jahán ko dikhá.

5 Kyúñki us ke bhái bhí us par ímán na lá,e.

6 Tab Yisú' ne unheñ farmáyá, ki Merá waqt hanoz nahín áyá : par tumhárá waqt har dam baná hai.

7 Dunyá tum se 'adáwat nahín̄ rakh saktí ; par mujh se 'adáwat rakhtí, kyúñki main̄ us par ga-

wáhí detá hún, ki us ke kám bure hain.

8 Tum is 'íd men jáo: main abhí is 'íd men nahín játá, ki merá waqt hanoz púrá nahín huá.

9 So wuh yih báten unhen kahke Galíl men rahá.

10 ¶ Lekin jab us ke bhái rawána húe the, wuh bhí us 'íd men gayá, záhirá nahín, balki chhipke.

11 Tab Yahúdí 'íd men use dhúnjhne lage aur kahá, ki Wuh kahán hai?

12 Aur logon men us kí bábat barí takrár thí: ba'ze kahte the, ki Wuh nek ádmí hai: aur kitne kahte the, ki Nahín, balki wuh logon ko gumráh kartá.

13 Lekin Yahúdión ke dár se koí shakhs záhirá us kí bábat na kahtá thá.

14 ¶ Aur jab 'íd ádhí guzar gayí, Yisú' ne haikal men jáke ta'lím dí.

15 Tab Yahúdí ta'ajjub se bole, ki is mard ko bagair parhe kyúñkar kitábon ká 'ilm hai?

16 Yisú' ne unhen jawáb men kahá, ki Merí ta'lím merí nahín, balki us kí hai, jis ne mujhe bhejá.

17 Wuh shakhs jo us kí marzí par chalá cháhe, jánegá, ki yih ta'lím Khudá kí hai, yá ki main áp se détá hún.

18 Wuh jo apní taraf se kuchh kahtá hai, apní buzurgí cháhtá hai: lekin wuh jo us kí buzurgí cháhtá hai, jis ne use bhejá, so wuhí sachchá hai, aur us men nárástí nahín.

19 Kyá Músá ne tumhen shari'at na dí, lekin koí tum men se shari'at par 'amal nahín kartá? Tum kyúñ mere qatl kí fíkr men ho?

20 Logon ne jawáb diyá, aur kahá, Tujh par ek deo hai; kaun tujhe qatl kiyá cháhtá hai?

21 Yisú' ne jawáb men unhen kahá, Main ne ek kám kiyá, aur tum sab us ke bá'is ta'ajjub karte ho.

22 Músá ne tumhen khatne ká hukm diyá, hálánki wuh Músá se nahín, balki bápdádon se hai; so tum sabt ke din ádmí ká khatna karte ho.

23 Pas agar sabt ke roz ádmí ká khatna kiyá játá hai, táki Músá ke shar'a se 'udúl na ho, to kyá tum is liye mujh par gusse ho, ki main ne sabt ke din ek mard ko bilkull changá kiyá?

24 Záhir ke muwáfiq 'adálat na karo, balki wájibí 'adálat karo.

25 Tab ba'ze Yarúsalamíon ne kahá, Kyá yih wuh nahín, ki jise qatl kiyá cháhte hain?

26 Lekin dekho, wuh to bedharak boltá hai, aur we use kuchh nahín kahte; pas kyá sardáron ne bhí yaqín kiyá, ki filhaqíqat yihí Masíh hai?

27 Lekin hamen ma'lúm hai, ki yih kahán ká hai; par Masíh jab áwegá, to koí na jánegá, ki wuh kahán ká hai.

28 Tab Yisú' haikal men ta'lím dete húe yún pukárá, ki Tum mujhe pahchánte, aur jánte ho, ki main kahán ká hún: aur main áp se nahín áyá hún, magar merá bhejnewálá sachchá hai, jis se tum wáqif nahín ho.

29 Main use jántá hún; is liye ki main us kí taraf se hún, aur us ne mujhe bhejá hai.

30 Tab unhoñ ne cháhá, ki use pakar len: par is liye ki us ká waqt hanoz na pahunchá thá, kisi ne us par háth na dálá.

31 Aur un logon men se bahu-tere us par ímán lá,e, aur bole ki Jab Masíh áwegá, to kyá in se, jo us ne dikháé hain, ziyáda mu'ajize dikháwegá?

32 ¶ Farísíon ne jamá'at kí takrár, jo us kí bábat ho rahí thí, suní; tab Farísíon aur sardár káhinoñ ne piyáde bheje, ki use pakar len.

33 Us waqt Yisú' ne unhen kahá, Ab thoří der tak main tumháre sáth hún, tab us pás, jis ne mujhe bhejá, játá hún.

34 Tum mujke dhúndhoge, aur na páoge, aur jahán main hún, tum á na sakoge.

35 Us waqt Yahúdión ne ápas men kahá, ki Wuh kahán jáegá, jo use ham na páwenge? kyá wuh un logon ke pás, jo Yúnáníon men paráganda húe, jáegá, aur Yúnáníon ko ta'lím degá?

36 Yih kyá bát hai, jo us ne kahí, ki Tum mujhe dhúndhoge, aur na páoge: aur jahán main hún, tum na á sakoge?

37 Phir 'íd ke pichhle din, jo bará din hai, Yisú' khará húá, aur pukárke kahá, Agar koí piyásá ho, mujh pás áwe, aur pí,e.

38 Jo mujh par ímán látá hai, us ke badan se, jaisá kitáb kahtí hai, jíte pání kí nadíán járí hongí.

39 Us ne yih Rúh kí bábat kahí, jise we, jo us par ímán lá,e, páne par the; kyúnki Rúh i Quds ab tak na utrí thí, is liye ki Yisú' hanoz apne jalál ko na pahunchá thé.

40 ¶ Tab un logon men se bahuteron ne yih sunkar kahá, Filhaqíat, yihi wuh Nabí hai.

41 Auron ne kahá, Yih Masíh hai. Par ba'zon ne kahá, Kyá Masíh Galíl se átā hai?

42 Kyá kitábon men yih bát nahín, ki Masíh Dáúd kí nasl se, aur Baitlaham kí bastí se, jahán Dáúd thé, átā hai?

43 So logon men us kí bábat iktíhiláf húá.

44 Aur ba'zon ne cháhá thé, ki use pakarlen, par kisí ne us par háth na dále.

45 ¶ Tab piyáde Sardár Káhinoñ aur Farísíon ke pás áe, aur unhoñ ne un se kahá, Tum use kyún na láe?

46 Piyádon ne jawáb diyá, ki Hargiz kisí shakhs ne is ádmí kí mánind kalám nahín kahá.

47 Tab Farísíon ne unhen jawáb diyá, Kyá tum bhí gumráh kíe gae ho?

48 Kyá koí sardáron yá Farísíon men se us par ímán láyá?

49 Par yih log, jo sharíat se wáqif nahín, la'natí hain.

50 Niqúdemús ne, jo rát ko Yisú' pás áyá thé, aur un men se ek thé, unhen kahá,

51 Kyá hamári sharíat kisí ko, peshtar us se, ki us kí sune aur jáne ki wuh kyá kartá hai, gunáhgár thahratí hai?

52 Unhon ne us ke jawáb men kahá, Kyá tú bhí Galíl hai? Dhúndh, aur dekh: ki Galíl se koí nabí záhir nahín húá.

53 Phir har ek apne ghar ko gayá.

VIII BÁB.

1 TAB Yisú' koh i Zaitún ko gayá.

2 Aur subh sawere haikal men phir dákhil húá, aur sab log us ke pás á,e; aur us ne baiñkar unhen ta'lím dí.

3 Tab Faqíh aur Farísí ek'aurat ko, jo ziná men pakrí gaí thé, us pás lá,e, aur use bích men khará karke us se kahá, ki,

4 Ai Ustád, yih 'aurat ziná men 'ain fi'al ke waqt pakrí gaí.

5 Músá ne to Tauret men ham ko hukm diyá hai, ki aisiñ ko sangsár karen; par tú kyá kahtá hai?

6 Unhon ne ázmáish ke liye yih kahá, táki us par nálish kí wajh páwen. Par Yisú' jhukke unglí se zamín par likhne lagá.

7 Aur jab we us se suwál karte ga,e, to us ne sídhe hokar unhen kahá, Jo kí tum men begunáh hai, pahle wuhí use patthar máre.

8 Aur phir jhukke zamín par likhá.

9 Aur we yih sunkar dil hí dil men áp ko gunáhgár samajhke bañon se leke chhoñ tak ek ek karke chale ga,e: aur Yisú' akelá rah gayá, aur 'aurat bích men khari rahí.

10 Tab Yisú' ne sídhe hokar 'aurat ke siwá kisí ko na dekhá,

aur us se kahá, Ai'aurat, we tere nálish karnewále kahán hain? kyá kisí ne tujh par hukm na kiyá?

11 Wuh bolí, Ai Khudáwand, Kisí ne nahín. Yisú' ne us se kahá, Main bhí tujh par hukm nahín kartá; já aur phir gunáh na kar.

12 ¶ Tab Yisú' ne phir unhen kahá, Jahán ká nür main hún; jo merí pairawí kartá hai, andhere men na chalegá, balki zindagí ká nür páwegá.

13 Tab Farísón ne us se kahá, Tú apne haqq men gawáhí detá hai; terí gawáhí sach nahín.

14 Yisú' ne jawáb diyá, aur unhen kahá, Agarchi main apní bábat gawáhí detá hún, taubhí merí gawáhí sach hai: kyúnki main jántá hún, ki main kahán se áyá hún, aur main kahán ko játá hún; par tum nahín jánte, ki main kahán se áyá hún, aur kahán ko játá hún.

15 Tum jism ke mutábiq hukm karte ho, main kisí par hukm nahín kartá.

16 Aur agar main hukm karún, to merá hukm haqq hai, kyúnki main akelá nahín, par main aur Báp jis ne mujhe bhejá.

17 Tumhári sharí'at men yih bhí likhá hai, ki do ádmíon kí gawáhí sach hai.

18 Ek to main hún, jo apní bábat gawáhí detá hún, aur ek Báp jis ne mujhe bhejá hai, mere liye gawáhí detá hai.

19 Tab unhon ne us se kahá, Terá Báp kahán hai? Yisú' ne jawáb diyá, Tum na mujhe jánte, aur na mere Báp ko; agar tum mujhe jánte, to mere Báp ko bhí jánte.

20 Yisú' ne yih báten haikal ke andar bait ul mál men ta'lím dete hue kahín, aur kisí ne us par háth na dálá, ki us ká waqt hanoz na áyá thá.

21 Tab Yisú' ne phir unhen kahá, Main játá hún, aur tum mujhe dhúnđ hoge, aur apne gunáh

men maroge; jahán main játá hún, tum á nahín sakte ho.

22 Tab Yahúdión ne kahá, Kyá wuh apne taín már dálegá? jo kahtá hai, Jahán main játá hún, tum á nahín sakte ho.

23 Us ne unhen kahá, Tum níche se ho, main úpar se hún; tum is jahán ke ho, maiñ is jahán ká nahín hún.

24 Is liye main ne tumhen kahá, kí tum apne gunáhon men maroge: kyúnki agar tum ímán nahín láte, ki main hí hún, to tum apne gunáhon men maroge.

25 Tab unhon ne us se kahá, Tú kaun hai? Yisú' ne unhen kahá, Wuhí jo main ne tumhen pahle hí se kahá.

26 Mujh pás bahut báten hain, ki tumháre haqq men kahuñ, aur hukm karún: par jis ne mujhe bhejá hai, sachchá hai: aur main bhí, wuh báten, jo main ne us se suní hain, jahán ko kahtá hún.

27 We na samjhe, ki wuh un se Báp kí bábat kahtá thá.

28 Phir Yisú' ne unhen kahá, Jab tum Ibn i Ádam ko chaṛháoge, tab tum jánoge, ki main hún, aur main áp se kuchh nahín kartá; magar jo mere Báp ne mujhe sikhláyá, main wuh báten kahtá hún.

29 Aur jis ne mujhe bhejá hai, mere sáth hai; Báp ne mujhe akelá nahín chhořá, kyúnki main hamesha aise kám kartá hún, jo use khush áte hain.

30 Jab wuh yih báten kahtá thá, to bahutere us par ímán lá,e.

31 Tab Yisú' ne un Yahúdión ko, jo us par ímán lá,e the, kahá, Agar tum merí bát par sábit rahoge, to tum tahqíq mere shágird ho;

32 Aur sachái ko jánoge, aur sachái tum ko ázad karegi.

33 ¶ Unhon ne use jawáb diyá, Ham Abirahám kí nasl hain aur kisí ke gulám kabhú na the, tú kyúnkar kahtá hai, ki Tum ázad kiye jáoge?

34 Yisú' ne unhen jawáb diyá, Main tum se sach sach kahtá hún, ki Jo koí gunáh kartá hai, gunáh ká gulám hai.

35 Aur gulám abad tak ghar men nahín rahtá; Beṭá abad tak rahtá hai.

36 Pas agar Beṭá tum ko ázáf karegá, to tum tahqíq ázáf hoge.

37 Main jántá hún, ki tum Abirahám kí nasl ho; lekin tum mere qatl kí fíkr men ho, kyúnki tum men mere kalám kí jagah nahín.

38 Main ne jo kuchh apne Báp ke pás dekhá hai, wuhí kahtá hún: aur tum, wuh jo tum ne apne báp ke pás dekhá hai, karte ho.

39 Unhon ne jawáb men us se kahá, Hamárá Báp Abirahám hai. Yisú' ne unhen kahá, Agar tum Abirahám ke farzand hote, to tum Abirahám ke kám karte.

40 Par tum mujhe qatl kiyá cháhte ho, jo aisá shakhs hai, ki haqq bát, jo main ne Khudá se suní, tumhen kahí; yih Abirahám ne nahín kiyá.

41 Tum apne báp ke kám karte ho. Tab unhon ne us se kahá, Ham harám se paidá nahín húe; hamárá báp ek hai, ya'ne Khudá.

42 Yisú' ne unhen kahá, Agar Khudá tumhárá báp hotá, to tum mujhe 'azíz jánte; kyúnki main Khudá se niklá, aur áyá hún; kyúnki main áp se nahín áyá, par us ne mujhe bhejá.

43 Tum merí 'ibárat kyún nahín samajhte? is liye ki merá kalám sun nahín sakte.

44 Tum apne báp Shaitán se ho, aur cháhte ho, ki apne báp kí khwáhish ke muwáfiq karo. Wuh to shurú' se qátil thá, aur sachái par sábit na rahá; kyúnki us men sachái nahín. Jab wuh jhúth kahtá hai, to apne hí se kahtá hai; kyúnki wuh jhúthá hai, aur jhúth ká bání hai.

45 Par tum is sabab se, ki main sach kahtá hún, mujh par ímán nahín láte.

46 Kaun tum men se mujh par gunáh sábit kartá hai? Agar main sach kahtá hún, tum mujh par ímán kyún nahín láte?

47 Jo Khudá ká hai, Khudá kí báten suntá hai: tum is liye nahín sunte ho, ki tum Khudá ke nahín ho.

48 Tab Yahúdión ne jawáb men us se kahá, Kyá ham achchhá nahín kahte, ki tú Sámarí hai, aur tere sáth ek deo hai?

49 Yisú' ne jawáb diyá, Mere sáth deo nahín, par main apne Báp kí 'izzat kartá hún, aur tum merí be'izzatí karte ho.

50 Aur main apní buzurgí nahín dhúndhítá: ek hai, jo dhúndhítá hai, aur hukm kartá hai.

51 Main tum se sach sach kahtá hún, Agar koí shakhs mere kalám par 'amal kare, to wuh abad tak maut ko hargiz na dekhégá.

52 Tab Yahúdión ne us se kahá, Ab ham ne jána, ki tere sáth ek deo hai. Abirahám aur ambiyá mar ga,e, aur tú kahtá hai, Agar koí shakhs mere kalám par 'amal kare, to abad tak maut ká maza na chakhegá.

53 Kyá tú hamáre báp Abirahám se buzurgtar hai, aur wuh mar gayá? ambiyá bhí mar ga,e; tú apne taín kyá thahrátá hai?

54 Yisú' ne jawáb diyá, Agar main apní buzurgí kartá hún, to merí buzurgí kuchh nahín: par merá Báp hai jise tum kahte ho, ki hamárá Khudá hai, wuh merí buzurgí kartá hai.

55 Tum ne use nahín jána; lekin main use jántá hún; aur agar main kahín, ki main use nahín jántá, to main tumhárí tarah jhúthá húngá: par main use jántá hún, aur us ke kalám par 'amal kartá hún.

56 Tumhárá báp Ábirahám bahut mushtáq thá, ki mere din dekhe: chunánchi us ne dekhá aur khush húá.

57 Tab Yahúdión ne us se kahá,

Terí' umr to pachás baras kí nahín, aur kyá tú ne Abirahám ko dekhá hai?

58 Yisú' ne unhen kahá, Main tum se sach sach kahtá hún, Peshtar us se ki Abirahám ho, main hún.

59 Tab unhon ne patthar utháé, ki use máren; par Yisú' ne apne taín poshida kiyá, aur un ke bich se guzarkar haikal se niklá, aur yún chalá gayá.

IX BÁB.

1 PHIR us ne játe húe ek shakhs ko, jo janam ká andhá thá, dekhá.

2 Aur us ke shágirdon ne us se púchhá, ki Ai Rabbí, gunáh kis ne kiyá; is shakhs ne, yá us ke má báp ne, kí' yih andhá paidá húá?

3 Yisú' ne jawáb diyá, Na to is shakhs ne gunáh kiyá, na us ke má báp ne; lekin yún húá, takí Khudá ke kám us men záhir fówen.

4 Zarúr hai, ki jis ne mujhe bhejá, main us ke kámon ko, jab tak ki din hai, karún; rát átí hai, aur koí us waqt kám nahín kar saktá.

5 Jab tak main jahán men hún, jahán ká nür hún.

6 Yih kahke, us ne zamín par thúká, aur thúk se mití gúndhí, aur wuh mití us andhe kí ánkhon par lep kí,

7 Aur us se kahá, Já, aur Siloám ke hauz men, (jis ká tarjuma Bhejá húá hai), nahá. Tab wuh jáke naháyá, aur bíná hoke áyá.

8 ¶ Tab hamsáyon ne, aur jin hon ne áge use andhá dekhá thá, kahá, Kyá yih wuh nahín, jo baiثá húá bhíkh mángrtá thá?

9 Ba'zon ne kahá, Yih wuhí hai: auron ne kahá, Yih us kí mánind hai: us ne kahá, Main wuhí hún.

10 Phir unhon ne us se kahá, Terí ánkhen kyúnkar khul gaín?

11 Us ne jawáb diyá, aur kahá, ki Ek mard ne, jis ká nám Yisú' hai, mití gúndhí, aur merí ánkhon par lagái, aur mujhe kahá, ki Siloám ke hauz men Já, aur nahá. So main jáke naháyá, aur bíná húá.

12 Tab unhon ne us se kahá, ki Wuh kahán hai? Us ne kahá, Main nahín jántá.

13 ¶ We use, jo pahle andhá thá, Farísíón pás le ga,e.

14 Aur jab ki Yisú' ne mití gúndhke us kí ánkhen kholín thín, sabt ká din thá.

15 Phir Farísíón ne bhí us se púchhá, ki Tú ne apní ánkhen kyúnkar páin? Us ne unhen kahá, ki Us ne merí ánkhon par gílí mití lagái, aur main naháyá, aur bíná húá.

16 Tab Farísíón men se ba'zon ne kahá, Yih mard Khudá kí taraf se nahín, kyúnki sabt ke din ko nahín mántá. Auran ne kahá, Kyúnkar ho saktá hai, ki gunahgár insán aise mu'ajize di-kháe? So un men iکhtiláf thá.

17 Unhon ne us andhe shakhs ko phir kahá, Tú us ke haqq men, jis ne terí ánkhen kholín, kyá kahtá hai? Wuh bolá, ki Wuh nabí hai.

18 Par Yahúdíón ne yih bát yaqín na kí, ki wuh andhá thá, aur bíná húá, jab tak ki unhon ne us shakhs ke má báp ko, jo bíná húá thá, buláyá,

19 Aur un se púchhá, ki Kyá yih tumhárá betá hai, jise tum kahte ho, andhá paidá húá? phir wuh ab kyúnkar dekhtá hai?

20 Us ke má báp ne jawáb men unhen kahá, Ham jánte hain, ki yih hamará betá hai, aur yih, ki wuh andhá paidá húá:

21 Lekin yih ham nahín jánte, ki wuh ab kyúnkar dekhtá hai; yá kis ne us kí ánkhen kholí hon, ham nahín jánte; wuh jawán hai, us se púchho, to wuh apní áp kahegá.

22 Us ke má báp Yahúdíón se

darte the, aur is liye unhon ne yih kahá; kyúンki Yahúdion ne eká kiyá thá, ki agar koí iqrár kare, ki wuh Masih hai, to 'ibádatkháne se khárij ho jáwe.

23 Is wáste us ke má báp ne kahá, ki Wuh jawán hai, us se púchho.

24 Tab unhon ne us shakhs ko, jo andhá thá, phir bulákar kahá, ki Khudá kí buzurgí kar; ham jánte hain, ki yih mard gunahgár hai.

25 Us ne jawáb diyá aur kahá, ki Main nahín jántá, ki wuh gunahgár hai: main ek bát jántá hún, ki main andhá thá, ab bíná hún.

26 Tab unhon ne us se phir púchhá, ki Us ne tujh se kyá kiyá? kyúンkar us ne terí ánkhen kholín?

27 Us ne jawáb diyá, Main ne to tumheñ abhí kahá, tum ne na suná: kyá tum phir suná cháhte ho? kyá tum bhí us ke shágird hoge?

28 Tab unhon ne us se malámat kí aur kahá, Tú us ká shágird hai; ham Músá ke shágird hain.

29 Ham jánte hain, ki Khudá ne Músá ke sáth kalám kiyá, par ham nahín jánte, ki yih kahán ká hai.

30 Us shakhs ne jawáb men unhen kahá, Is men ta'ajjub hai, ki tum nahín jánte, ki yih kahán ká hai, aur us ne merí ánkhen kholí hain.

31 Ham jánte hain, ki Khudá gunahgáron kí nahín suntá, par agar koí Khudá-parast ho, aur us kí marzí par chale, to us kí wuh suntá hai.

32 Dunyá ke shurú' se sunne men nahín áyá, ki kisí ne janam ke andhe kí ánkhen kholín hon.

33 Agar yih mard Khudá kí taraf se na hotá, to kuchh na kar saktá.

34 Unhon ne jawáb men us se kahá, Tú to bilkull gunáhon men

paidá húá, anr kyá ham ko sikh-látá hai? Tab unhon ne use báhar nikál diyá.

35 Yisú' ne suná, kí unhon ne use báhar nikál diyá, tab us ne use pákar kahá, Kyá tú Khudá ke Beṭe par ímán látá hai?

36 Us ne jawáb men kahá, Ai Khudáwand, wuh kaún hai, ki main us par ímán láúń?

37 Yisú' ne us se kahá, Tú ne to use dekhá hai, aur jo tujh se boltá hai, wuhí hai.

38 Us ne kahá, Ai Khudáwand, main ímán látá hún. Aur us ne use sijda kiyá.

39 ¶ Tab Yisú' ne kahá, ki Main 'adálat ke liye is dunyá men áyá hún, taki we jo nahín dekhte hain, dekhen, aur jo dekhte hain, andhe ho jáwen.

40 Aur Farísíon ne, jo us ke sáth the, yih báten sunke us se kahá, Kyá ham bhí andhe hain?

41 Yisú' ne unheñ kahá, Agar tum andhe hote, to gunahgár na hote: par ab tum to kahte ho ki, Ham dekhte hain; is liye tum-hará gunáh rahtá hai.

X BÁB.

1 **M**AİN tum se sach sach kahtá húń, Jo ki darwáze se bherkháne men dákhil nahín hotá, balki aur taraf se úpar charhtá hai, wuh chor aur batmár hai.

2 Lekin wuh jo darwáze se dákhil hotá hai, bheren ká gaṛariyá hai.

3 Us ke liye darbán kholtá hai; aur bheren us kí áwáz suntí hain; aur wuh apní bheren ko nám leke bulátá hai, aur unheñ báhar le játá hai.

4 Aur jab wuh apní bheren ko báhar nikáltá hai, to un ke áge áge chaltá hai, aur bheren us ke pichhe ho letí hain; kyúンki we us kí áwáz pahchántí hain.

5 Aur we begáne ke pichhe nahín játín, balki us se bhágtí

hain; is liye ki begánoñ kí áwáz nahín pahchántín.

6 Yísú' ne yih tamsíl unhen kahí; lekin we na samjhe, ki yih kyá báten thíñ, jo wuh un se kahtá thá.

7 Tab Yísú' ne unhen phir kahá, Main tum se sach sach kahtá hún, ki Bheron ká darwáza maiñ hún.

8 Sab jitne mujh se áge á,e, chor aur batmár hain: par bheron ne un kí na suní.

9 Darwáza maiñ hún: agar koí shakhs mujh se dákhil ho, to naját páwegá, aur andar báhar á,e já,egá, aur charágáh páegá.

10 Chor nahín átā, magar churáne, aur qatl karne, aur halák karne ko: maiñ áyá hún, taki we zindagí páwen, aur ziyáda hásil karen.

11 Achhhá garariyá main hún: achhhá garariyá bheron ke liye apní ján detá hai.

12 Par mazdúr, aur wuh jo garariyá nahín, aur bheron ká málík nahín, bheriyá áte dekhkar bheron ko chhoñ detá hai, aur bhág játá hai, aur bheriyá unhen pakartá hai, aur bheron ko paráganda kartá hai.

13 Mazdúr bhágtá hai, kyúñki wuh mazdúr hai, aur bheron ke liye fíkr nahín kartá.

14 Achhhá garariyá main hún, aur apníon ko pahchántá hún, aur merí mujhe jántí hain.

15 Jis tarah se Báp mujhe jántá hai, us tarah main Báp ko jántá hún: aur main bheron ke liye apní ján detá hún,

16 Aur merí aur bhí bheren hain, jo is bherkháne kí nahín; zarúr hai, ki main unhen bhí láun, aur we merí áwáz sunengín, aur ek hí galla, aur ek hí garariyá hogá.

17 Báp mujhe is liye piyár kartá hai, ki maiñ apní ján detá hún, taki main use phir lún.

18 Koí shakhs use mujh se nahín letá, par maiñ use áp se detá hún; merá ikhtiyár hai, ki

use dún, aur merá ikhtiyár hai, ki use phir lún. Yih hukm maiñ ne apne Báp se páyá.

19 ¶ Tab Yahúdión ke bích, in báton ke sabab, phir ikhtiláf húá.

20 Aur bahuton ne un men se kahá, ki Us ke sáth ek deo hai, aur wuh sirí hai, tum us kí kyún sunte ho?

21 Auron ne kahá, Yih báten díwáne kí nahín. Kyá deo andhe kí áñkhen khol saktá hai?

22 ¶ Yarúsalam men tajdíd kí id húí, aur járe ká mausim thá.

23 Aur Yísú' haikal ke andar Sulaimání usáre men phirtá thá.

24 Tab Yahúdión ne use á gherá aur us se kahá, ki Tú kab tak hamáre dil ko adhar men rakhegá? Agar tú Masíh hai, to ham ko sáf kah de.

25 Yísú' ne unhen jawáb diyá, ki Maiñ ne to tumhen kahá, aur tum ne yaqín na kiyá: jo kám maiñ apne Báp ke nám se kartá hún, yih mere gawáh hain.

26 Lekin tum ímán nahín láte, kyúñki jaisá main ne tumhen kahá, tum merí bheron men se nahín.

27 Merí bheren merí áwáz suntí hain, aur maiñ unhen jántá hún, aur we mere píchhe chaltí hain.

28 Aur maiñ unhen hamesha kí zindagí bakhshítá hún, aur we kabhi halák na hongín: aur koí unhen mere háth se chhín na legá.

29 Merá Báp, jis ne unhen mujhe diyá hai, sab se bará hai; aur koí unhen mere Báp ke háth se chhín nahín le saktá.

30 Maiñ aur Báp ek hain.

31 Tab Yahúdión ne phir patthar utháé ki us par patthráo karen.

32 Yísú' ne unhen jawáb diyá, ki Maiñ ne apne Báp ke bahut se achchhe kám tumhen dikháe hain; un men se kis kám ke liye tum mujhe patthráo karte ho?

33 Yahúdión ne use jawáb diyá,

aur kahá, ki Ham tujhe achchhe kám ke liye nahín, balki is liye tujhe patthráo karte hain, ki tú kufr kahtá hai, aur insán hoke apne taín Khudá banátá hai.

34 Yisú' ne unhen jawáb diyá, Kyá tumhári shari'at men yih nahín likhá hai, ki Main̄ ne kahá, Tum Khudá ho?

35 Jab ki us ne unhen, jin ke pás Khudá ká kalám áyá, Khudá kahá, aur mumkin nahín ki kitáb bátil ho;

36 Tum use, jise Khudá ne makhsús kiyá, aur jahán men bhejá, kahte ho, ki Tú kufr baktá hai, ki main ne kahá, Main̄ Khudá ká Beṭá hún.

37 Agar main apne Báp ke kám nahín kartá, to mujh par ímán mat láo.

38 Lekin agar main kartá hún, to agarchi mujh par ímán na láo, taubhí kámon par ímán láo, taki tum jáno, aur yaqín karo, ki Báp mujh men̄ hai, aur main̄ us men̄ hún.

39 Tab unhoñ ne phir cháhá, ki use pakar len; par wuh un ke háthon se nikal gayá,

40 Aur Yardan ke pár, us jagah, jahán Yuhanná pahle baptismal diyá kartá thá, phir gayá; aur wahán rahá.

41 Aur bahutoñ ne us pás jáke kahá, ki Yuhanná ne to koí mu'ajiza nahín dikháyá, par sab báten jo Yuhanná ne is ke haqq men kahín, sachchí thín.

42 Aur wahán bahut se us par ímán lá,e.

XI BÁB.

AUR La'azar náme ek shakhs Bait'aniyá ká rahnewálá, jo Mariyam aur us kí bahin Marthá ke gánw ká thá, bímár thá.

2 (Wuhí Mariyam, jis ne Khudá-wand ko 'itr malá, aur apne bálon se us ke páon ko ponchhá thá, usí ká bháí La'azar bímár thá.)

3 So us kí bahinon ne us ko yih

kahlá bhejá, ki Ai Khudáwand, dekh, jise tú piyár kartá hai, bímár hai.

4 Yisú' ne sunke kahá, ki Yih maut kí bímári nahín, lekin Khudá kí buzurgí ke liye hai, taki us ke sabab se Khudá ke Beṭe kí buzurgí kí jáwe.

5 Aur Yisú' Marthá ko, aur us kí bahin aur La'azar ko piyár kartá thá.

6 So jab us ne suná, ki wuh bímár hai, do aur roz us jagah, jahán wuh thá, rahá.

7 Phir ba'd us ke shágirdon se kahá, Áo, ham phir Yahúdiya men jáen.

8 Shágirdon ne us se kahá, Ai Rabbí, abhí Yahúdión ne cháhá thá, ki tujhe patthráo karen, aur tú wahán phir játá hai?

9 Yisú' ne jawáb diyá, ki Kyá din ke bárah ghante nahín? Agar koi, din ke waqt, chale, to wuh thokar nahín khátá; kyúnki wuh is jahán kí roshní dekhtá hai.

10 Par agar koi rát ke waqt chale, to wuh thokar khátá hai, kyúnki us men roshní nahín.

11 Us ne yih báten kahín; aur ba'd us ke un se kahá, ki Hamará dost La'azar so gayá hai; par main játá hún, ki use jagáun.

12 Tab us ke shágirdon ne kahá, Ai Khudáwand, agar wuh sotá hai, to changá ho ja,egá.

13 Yisú' ne to us kí maut kí bábat kahá, par unhoñ ne khyál kiyá, ki us ne nínd ke áram kí farmái.

14 Tab Yisú' ne unheñ sáf kahá, ki La'azar mar gayá.

15 Aur main tumháre liye is par khush hún, ki main waháñ na thá, taki tum ímán láo; par áo aur us pás jáen.

16 Tab Thúmá ne, jise Didumús kahte hain, apne ham-shágirdon se kahá, Áo, ham bhí chalen, taki us ke sáth maren.

17 Pas Yisú' ne áke daryáft kiyá ki chár din húe, ki use qabr men̄ rakhá.

18 Aur Bait'aniyá Yarúsalam se nazdík, taḥkmíman do kos ke qarib, thá.

19 Aur bahut se Yahúdí, Marthá aur Mariyam ke pás á,e the, ki un ke bhái kí bábat un se mätampursí karen,

20 So Marthá ne jon suná ki Yisú' áta hai, us ká istiqbál kiyá; par Mariyam ghar men baiṭhi rahí.

21 Tab Marthá ne Yisú' ko kahá, Ai Khudáwand, agar tú yahán hotá, to merá bhái na martá.

22 Lekin main jántí hún, ki ab bhí, jo kuchh tú Khudá se mágne, Khudá tujhe degá.

23 Yisú' ne us se kahá, Terá bhái phir uṭhegá.

24 Marthá ne kahá, Main jántí hún, ki qiyámat men pichhle din phir uṭhegá.

25 Yisú' ne us se kahá, Qiyámat aur zindagí main hí hún; jo mujh par ímán láwe, agarchi wuh mar já,e, jí,egá.

26 Aur jo koī jítá hai, aur mujh par ímán látá hai, kabhí na māregá. Kyá tú yih yaqín rakhtí hai?

27 Us ne us se kahá, Hán Ai Khudáwand, mujhe yaqín hai, ki Khudá ká Betá Masih, jo dunyá men ánewálá thá, tú hí hai.

28 Wuh yih kahke chalí gaí, aur chupke apní bahin Mariyam ko buláke kahá, ki Ustád áyá hai, aur tujhe bulátá hai.

29 Wuh yih bát sunte hí jald uṭhí, aur us pás á,i.

30 Aur Yisú' hanoz bastí men na pahunchá thá, balki usí jagah thá, jahán Marthá use milí thi.

31 Tab Yahúdí jo us ke sáth ghar men the, aur use tasallí dete the, yih dekhke ki Mariyam jald uṭhí, aur báhar gaí, yún kahte húe us ke píchhe ho lie, ki Wuh qabr par rone játí hai.

32 Aur jab Mariyam wahán jahán Yisú' thá á,i, aur use dekhá, to us ke qadamon par girke kahá,

Ai Khudáwand, agar tú yahán hotá, to merá bhái mar na játá.

33 Jab Yisú' ne us ko dekhá, ki rotí hai, aur Yahúdión ko bhí, jo us ke sáth á,e the, ki rote hain, to dil se áh mári aur mätam kiyá,

34 Aur kahá, Tum ne use kahán rakhá? Unhoñ ne kahá, Ai Khudáwand, á, aur dekh.

35 Yisú' royá.

36 Tab Yahúdí bole, ki Dekho, use kitná piyár kartá thá!

37 Ba'zon ne un men se kahá, Kyá yih mard jis ne andhe kí áṅkhen kholín, na kar saká, ki yih shakhs bhí na martá.

38 Tab Yisú' apne dil se phir áh kartá húa qabr par áyá. Wuh ek gár thá, aur us par ek paṭiyá dharí thi.

39 Yisú' ne kahá, ki Patthar uṭháo? Us murde kí bahin Marthá ne us se kahá, Ai Khudáwand us se to ab badbú átí hai, kyúnki use chár din húe.

40 Yisú' ne us se kahá, Kyá main ne tujhe nahín kahá, ki Agar tú ímán láwe, to Khudá ká jalál dekhégi?

41 Tab unhoñ ne paṭiye ko wahán se, jahán wuh murda gaṛá thá, uṭháyá. Yisú' ne apní áṅkhen uṭhá,ín aur kahá, Ai Báp, main terá shukr kartá hún, ki tú ne merí suní hai:

42 Aur main ne jáná ki tú merí nit suntá hai: par in logon ke bá'is, jo ás pás khaṛe hain, main ne yih kahá, taki we ímán láwen, ki tú ne mujhe bhejá hai.

43 Aur yih kahke buland áwáz se chilláyá, ki Ai La'azar, báhar nikal á.

44 Tab wuh jo mar gayá thá, kafan se háth o páñw bandhe húe nikal áyá: aur us ká chihra girdágird rúmál se lapeṭá húa thá. Yisú' ne unheñ kahá, Use khol do, aur jáne do.

45 Tab Yahúdión men se bahutere jo Mariyam kane á,e the, aur Yisú' ká yih kám dekhá thá, us par ímán lá,e.

46 Par un men se ba'zon ne Farísíon ke pás jáke wuh kám, jo Yisú' ne kiyá thá, bayán kiyá.

47 ¶ Tab Sardár Káhinon aur Farísíon ne Sadr majlis jam'a kí, aur kahá, ki Ham kyá karte hain? ki yih mard bahut mu'ajize dikhátá hai.

48 Agar ham use yínhí chhoren to sab us par ímán láwenge; aur Rúmí áke hamáre mulk aur qaumiyat ko bhí le lenge.

49 Aur un men se ek ne, Qiyásá nám, jo us sál sardár káhin thá, un se kahá, Tum kuchh nahín jínte,

50 Aur na andesha karte ho, ki hamáre liye yih bihtar hai, ki ek ádmí qaum ke badle mare, na ki sári qaum halák howe.

51 Us ne yih apní taraf se na kahá; lekin us sabab se ki us baras Sardár Káhin thá, pesh-khabarí kí, ki Yisú' us qaum ke wáste maregá;

52 Aur na sirf us qaum ke wáste, balki is wáste bhí, ki wuh Khudá ke farzandon ko, jo paraganda hué, báham jam'a kare.

53 So we usí roz se ápas men mashwarat karne lage, ki us ko ján se máren.

54 Is waqt se Yisú' ne Yahúdión men záhirá phirná chhoṛá, balki wahán se bayábán kí nawáhí ke Ifráím nám ek shahr men gayá, aur apne shágirdon ke sáth wahán guzrán karne lagá.

55 ¶ Aur Yahúdión kí 'id i fasah nazdík thí, aur bahutere 'id ke pahle us nawáhí se Yarúsalam ko ga,e, táki apne taín pák karen.

56 Aur Yisú' kí talásh kí, aur haikal men khare hoke ápas men kahá, ki Tum kyá gumán karte ho, ki wuh 'id men na áwegá?

57 Aur Sardár Káhinon aur Farísíon ne bhí hukm diyá thá, ki agar koí jántá ho, ki wuh kahán hai, to dikhláwe, táki use pakar len.

XII BÁB.

1 P HIR Yisú', fasah se chhah roz áge, Bait'aniyá men jahán La'azar thá, jise us ne murdon men se utháyá thá, áyá.

2 Wahán unhon ne us ke liye ziyáfat kí, aur Marthá khidmat kartí thí, par La'azar ek un men se thá, jo us ke sáth kháne baiṭhe the.

3 Tab Mariyam ne ádh ser khális aur qímatí jaṭámásí ká 'itr lekar Yisú' ke páon par malá aur apne bálon se us ke pánw ponchhe; aur ghar 'itr kí bú :e bhar gayá thá.

4 Tab Yahúdáh Iskariyútí ne, jo Shama'ún ká betá, aur us ke shágirdon men se ek thá, jo use pakarwáyá cháhtá thá, kahá: ki,

5 Yih 'itr tín sau dínár ko kyún na bechá gayá, aur muhtájon ko na diyá gayá?

6 Us ne yih na is liye kahá, kí muhtájon kí kuchh fikr kartá thá, par is liye ki wuh chor thá, aur thailí sáth rakhtá thá, aur jo kuchh us men partá thá, uthá letá thá.

7 Tab Yisú' ne kahá, ki Use chhoṛ de, ki us ne yih mere roz i kafan ke liye rakhá thá.

8 Kyúnki muhtáj hamesha tumháre sáth honge, par main hamesha tumháre sáth nahín.

9 Aur Yahúdión ke bahut log ján ga,e, ki wuh wahán hai, aur we á,e, na sirf Yisú' ke sabab, balki is liye bhí, ki La'azar ko, jise us ne jiláyá thá, dekhen.

10 ¶ Tab Sardár Káhinon na mashwarat kí, ki La'azar ko bhí ján se máren;

11 Kyúnki us ke sabab se bahut Yahúdí phir ga,e, aur Yisú' par ímán lá,e the.

12 ¶ Dúsre roz, bahut log, jo 'id men á,e the, yih sunke, ki Yisú' Yarúsalam men átá hai,

13 Khajúr ke darakhton kí dálíán liyán, aur us ke istiqbál

ko nikle, aur pukáre, Hosh'anná! Mubárak wuh jo Khudáwand ke nám se átá hai, Ísráel ká Bádsháh.

14 Aur Yisú', ek gadhí ká bachcha pákar, us par sawár húá, jaisá ki likhá hai,

15 Ai Saíhún kí betí, mat dár; dekh, terá Bádsháh gadhí ke bachche par sawár hoke átá hai.

16 Us ke shágird pahle yih báten na samjhe, lekin jab Yisú' apné jalál ko pahunchá, tab unhon ne yád kiyá, ki yih báten us ke haqq men likhí thím, aur yih, ki unhon ne usí se yih sulúk kiyá.

17 Tab un logon ne, jo us ke sáth the, jis waqt us ne La'azar ko qabr se báhar buláyá, aur murdon men se ut्थáyá thá, gawáhí dí.

18 Is báis wuh bhír us ke istiqbál ko niklí, kyúnki unhon ne suná, ki us ne yih mu'ajiza dikháyá.

19 Tab Farísíon ne ápas men kahá, Tum dekhte ho, ki tum se kuchh ban nahín partá? Dekho, ki ek 'álam us ká pairau ho chalá.

20 ¶ Aur un ke darmiyán, jo 'íd men parastish karne á,e the, ba'ze Yúnání the.

21 We Failbús ke pás, jo Bait-saidá e Galil ká thá, á,e, aur us se 'arz kí, aur kahá, ki Ai sáhib, ham cháhte hain, ki Yisú' ko dekhen.

22 Failbús nc áke Andryás se kahá: aur phir Andryás aur Failbús ne Yisú' ko khabar dí.

23 ¶ Yisú' ne unhen yih jawáb diyá, aur kahá ki Waqt áyá, ki Ibn i Ádam jalál páwe.

24 Main tum se sach sach kahtá hún, ki Gehún ká dána, agar zamín men girke mar na jáwe, to akelá rahtá hai; par agar wuh mare, to bahut sá phal látá hai.

25 Jo apní ján ko 'azíz rakhtá hai, use khoegá; aur wuh, jo is jahán men apní ján se 'adáwat rakhtá hai, use hamesha kí zindagí ke liye mahfúz rakhegá.

26 Agar koí merí khidmat kare, to cháhiye ki wuh merí pairawí kare; aur jis jagah main hún, merá khádim bhí wahín hogá: agar koí merí khidmat kare to Báp us kí 'izzat karegá.

27 Ab merí ján ghábratí hai; aur main kyá kahún? ki Ai Báp, mujhe is gharí se bachá? lekin main to isí gharí ke liye áyá hún.

28 Ai Báp, apne nám ko jalál bakhsh. Wunhín ásmán se áwáz á,í, ki Main ne jalál bakhshá hai, aur phir jalál bakhshungá.

29 Tab logon ne, jo házir the, yih sunke kahá, ki Bádal garjá: auron ne kahá, ki Firishta us se bolá.

30 Yisú' ne jawáb diyá, aur kahá, ki Yih áwáz mere wáste nahín, balki tumháre liye á,í.

31 Ab is dunyá par hukm hotá hai: ab is dunyá ká sardár nikál diyá já, egá.

32 Aur main jo hún, agar zamín se úpar ut्थáyá jáún, to sabko apne pás khainchungá.

33 Us ne yih kahke patá diyá, ki Wuh kis maut se marne par hai.

34 Logon ne jawáb men kahá, Ham ne sharíat se suná hai, ki Masih abad tak rahegá, phir tú kyúnkar kahtá hai, ki Zarúr hai, ki Ibn i Ádam ut्थáyá já,e? yih Ibn i Ádam kaun hai?

35 Yisú' ne unhen kahá, ki Núr aur thorí der tak tumháre darmiyán hai. Jab tak ki núr tumháre pás hai, chalo, na ho ki tárikí tumheñ já pakre; aur wuh jo andhere men chaltá hai, nahín jántá, ki kidhar játá hai.

36 Jab tak nír tumháre pás hai, nír par ímán láo, taki tum nír ke farzand ho. Yisú' ne yih báten kahín, aur jáke apne taín un se chhipáyá.

37 ¶ Aur agarchi us ne un ke rú ba rú itne mu'ajize dikháe, par we ímán na lá,e:

38 Taki Yas'ayiáh nabíká kalám, jo us ne kahá, púrá howe, ki Ai

Khudáwand, hamáre paigám ko kis ne yaqín kiyá hai? aur Khudáwand ká háth kis par záhir húá hai?

39 Is liye we ímán na lá sake, ki Yas'ayiáh ne phir kahá,

40 Us ne un kí ánkhen andhí kiyán, aur un ke dil sahkt kí hain, tá na ho ki we ánkhon se dekhen, aur dil se samjhen, aur rujú láwen, aur main unhen changá karún.

41 Yas'ayiáh ne yih farmáyá thá, jab us ke jalál ko dekhá, aur us kí bábat báten kín.

42 ¶ Bawujúd us ke, sardáron men se bhí bahut us par ímán lá,e, magar Farísion ke bá'is, unhon ne iqrár na kiyá, na ho ki 'ibádatkháne se khárij kíe já,en.

43 Kyúnki we insán kí ta'ríf ko Khudá kí ta'ríf se ziyáda 'azíz jánté the.

44 ¶ Yisú' ne pukárke kahá, Wuh jo mujh par ímán látá hai, mujh par nahín, balki us par, jis ne mujhe bhejá, ímán látá hai.

45 Aur wuh, jo mujhe dekhtá hai, mere bhejnewále ko dekhtá hai.

46 Main jahán men nür hoke áyá hún, taki jo koí mujh par ímán láwe, andhere men na rahe.

47 Aur agar koí shákhs merí báten sune, aur ímán na láwe, to main us par hukm nahín kartá; kyúnki main is liye nahín áyá, ki jahán par hukm karún, balki is liye ki jahán ko bacháún.

48 Wuh jo mujhe haqír jántá, aur merí báton ko qabúl nahín kartá, us ke liye ek hukm karnewálá hai: kalám, jo main ne kahá hai, wuhí us ko pichhle din gunáhgár thahráegá.

49 Kyúnki main ne to áp se nahín kahá, balki Báp ne jis ne mujhe bhejá, mujhe farmán diyá, ki main kyá bolún, aur main kyá kahún.

50 Aur main jántá hún, ki us ká farmán hamesha kí zindágí hai: pas jo kuchh ki main kahtá hún,

jis tarah Báp ne mujhe kahá, usí tarah kahtá hún.

XIII BAB.

1 ¶ D i fasah se pahle, jab ki Yisú' ne jáná, ki mera waqt á pahunchá hai, ki is jahán se Báp pás jáún, so jaisá wuh áge apnon ko jo dunyá men the piyár kartá thá, waisá hí ákhír tak piyár kartá rahá.

2 Aur jab shám ká kháná khá-chuke, Shaitán ne Shama'ún ke bete Yahúdáh Iskariyútí ke dil men dálá, ki use pakarwáe.

3 Yisú', yih jánkar, ki Báp ne sab chízen mere háthon men dín, aur main Khudá ke pás se áyá, aur Khudá ke pás játá hún;

4 Kháne se uthá, aur apne kapre utár rakhe, aur rúmál lekar apni kamar men bándhá.

5 Ba'd us ke ek básan men páni dhálá, aur shágirdon ke pánw dhone, aur us rúmál se, jo kamar men bandhá thá, ponchhne lagá.

6 Phir wuh Shama'ún Patras tak áyá: tab us ne us se kahá, Ai Khudáwand, tú mere pánw dhotá hai?

7 Yisú' ne jawáb men us se kahá, Jo ki main kartá hún, ab tú nahín jántá, par ba'd us ke jánegá.

8 Patras ne us se kahá, ki Áp mere pánw kabhí na dhowen. Yisú' ne use jawáb diyá, Agar main tujhe na dhoún, to mere sáth terá hissa na hogá.

9 Shama'ún Patras ne us se kahá, ki Ai Khudáwand, sirf mere pánw nahín, balki mere háth aur sir bhí.

10 Yisú' ne us se kahá, Wuh jo dhoyá gayá hai, siwá pánw dhone ke, muhtáj nahí, balki sarásar pák hai; aur tum pák ho, lekin sab nahín.

11 Kyúnki wuh to apne pakarwánewále ko jántá thá, is liye us ne kahá Tum sab pák nahín ho.

12 Jab wuh un ke pánw dho-

chuká thá, aur apne kapre líe the, phir baiṭkar unheṇ kahá, Áyá tum jánte ho, ki maiṇ ne tum se kyá kiyá?

13 Tum mujhe Ustád, aur Khudáwand kahá karte ho: tum khúb kahte ho, kyúnki main hún.

14 Pas jab ki mujh Khudáwand aur Ustád ne tumháre pánw dhoe, to tumheṇ bhí lázim hai, ki ek dúsre ke pánw dhoo.

15 Is liye main ne tumheṇ ek namúna diyá hai, taki jaisá maiṇ ne tum se kiyá, tum bhí karo.

16 Maiṇ tum se sach sach kahtá hún, ki Naukar apne áqá se baṛá nahín, aur na wuh jo bhejá gayá hai, apne bhejnewále se.

17 Agar tum yih báten samajhte aur un par 'amal karte ho, to mubárak ho.

18 ¶ Maiṇ tum sab kí bábat nahín kahtá; maiṇ jántá hún, jinhen maiṇ ne chuná hai: lekin yih hotá taki nawishta púrā howe, Us ne, jo mere sáth rotí khátá hai, mujh par lát uṭhái hai.

19 Ab maiṇ tum se is ke wáqi' honé se pahle kahtá hún, ki jab wuh wuqú men áwe, to tum ímán lio, ki maiṇ hí hún.

20 Maiṇ tum se sach sach kahtá hún, Wuh, jo us ko jise maiṇ bhejtá hún qabúl kartá hai, mujhe qabúl kartá hai; aur wuh jo mujhe qabúl kartá hai, use, jis ne mujhe bhejá, qabúl kartá hai.

21 Yisú' yún kahke dil men ghabráyá, aur gawáhí deke bolá, Maiṇ tum se sach sach kahtá hún, ki Ek tum men se mujhe pakar-wá, egá.

22 Tab shágird shubha men hoke, ki us ne kis kí bábat kahá, ek dúsre ko dekhne lagá.

23 Aur us ke shágirdon men se ek, jise Yisú' piyár kartá thá, Yisú' kí chhátí kí taraf jhuká húa baiṭhá thá.

24 Tab Shama'ún Patras ne use ishára kiyá, ki daryáft kare, ki wuh jis kí bábat us ne kahá, kaun hai.

25 Tab us ne Yisú' ke síne par takya karke kahá, Ai Khudáwand, wuh kaun hai?

26 Yisú' ne jawáb diyá, Jise maiṇ niwále ko tar karke detá hún, wuhí hai. Phir us ne niwála tar karke, Shama'ún ke bete Yahúdáh Iskariyútí ko diyá.

27 Aur ba'd us niwále ke, Shaitán us men samáyá. Tab Yisú' ne use kahá, Jo kuchh ki tú kartá hai, jald kar.

28 Par un men se, jo kháne baiṭhe the, kisí ne na jáná, ki yih us ne use kis liye kahá.

29 Kyúnki ba'zon ne gumán kiyá ki is liye ki Yahúdáh ke pás thailí thi, ki Yisú' use yih kahtá thá, ki Jo ham ko 'íd ke liye darkár hai, mol le, yá yih, ki muhtájón ko kuchh de.

30 Pas wuh niwála lekar filfaur niklá; aur rát thi.

31 ¶ Jab wuh chalá gayá, Yisú' ne kahá, ki Ab Ibn i Adam ne jalál páyá, aur Khudá ne us ke bá'is jalál páyá.

32 Agar Khudá ne us se jalál páyá ho, to Khudá use bhí apne se jalál degá, aur use filfaur jalál degá.

33 Ai bachcho, Maiṇ thorí der tak tumháre sáth hún. Tum mujhe dhúndhoge, aur jaisá ki maiṇ ne Yahúdion se kahá, ki Jahán maiṇ játá hún, tum nahín á sakte, waisá ab maiṇ tumheṇ bhí kahtá hún.

34 Maiṇ tumhen nayá hukm detá hún, ki Ek dúsre se muhabbat rakho; jaisá maiṇ ne tum se muhabbat rakhí, aise hí tum bhí ek dúsre se muhabbat rakho.

35 Is se sab jánenge, ki tum mere shágird ho, agar tum ápas men muhabbat rakho.

36 ¶ Shama'ún Patras ne us se kahá, Ai Khudáwand, tú kahán játá hai? Yisú' ne jawáb diyá, Jahán maiṇ játá hún, tú ab mere píchhe á nahín saktá, par áge ko mere píchhe áwegá.

37 Patras ne use kahá, Ai Khu-

dáwand, main tere píchhe kyún ab nahín á saktá? Main tere liye apní ján díngá.

38 Yisú' ne use jawáb diyá, Kyá tú mere liye apní ján degá? Main tum se sach sach kahtá hún, ki Murg báng na degá, jab tak ki tú tín martaba merá inkár na kare.

BĀB XIV.

1 TUMHÁRÁ dil na ghabrá-we; tum Khudá par ímán láté ho, mujh par bhí ímán láo.

2 Mere Báp ke ghar men bahut makán hain, nahín to main tumhen kahtá: main játá hún táki tumháre liye jagah taiyár karún.

3 Aur jis hál ki main játá, aur tumháre liye jagah taiyár kartá, to phir áungá, aur tumhen apne sáth lúngá, táki jahán main hún, tum bhí hoo.

4 Aur jahán main játá hún, tum jánte ho aur rám bhí jánte ho.

5 Thúmá ne use kahá, Ai Khudáwand, ham nahín jánte, ki tú kahán játá hai, aur ham kyúnkar us rám ko ján saken?

6 Yisú' ne use kahá, Rám aur haqq aur zindagí main hún; koí, bagair mere wasíle, Báp ke pás á nahín saktá hai.

7 Agar tum mujhe jánte, to mere Báp ko bhí jánte; aur ab tum use jánte ho, aur use dekhá hai.

8 Failbús ne use kahá, Ai Khudáwand, Báp ko hamen dikhlá, ki hamen káfi hai.

9 Yisú' ne use kahá, Ai Failbús, main itní muddat se tumhare sáth hún, aur tú ne mujhe na jáná? jis ne mujhe dekhá hai, us ne Báp ko dekhá hai; aur tú kyúnkar kahtá hai, ki Báp ko hamen dikhlá?

10 Kyá tú yaqín nahín kartá, ki main Báp men hún, aur Báp mujh men hai? Yih báten jo main tumhen kahtá hún, main áp se nahín kahtá; lekin Báp, jo mujh

men rahtá hai, wuh yih kám kartá hai.

11 Merí bát yaqín karó, ki main Báp men hún, aur Báp mujh men hai; aur nahín to, in kámon ke sabab mujh par ímán láo.

12 Main tum se sach sach kahtá hún, ki Jo mujh par ímán látá hai, ye kám, jo main kartá hún, wuh bhí karegá, aur in se bhí baṛe kám karegá; kyúnki main apne Báp pás játá hún.

13 Aur jo kuchh tum mere nám se mángoge, main wuhí karúngá, taki Báp Beṭe men jalál páwe.

14 Agar tum mere nám se kuchh mángoge, to main wuhí karúngá.

15 ¶ Agar tum mujhe piyár karte ho, to mere hukmón par 'amal karo.

16 Aur main apne Báp se dár-khwást karúngá, aur wuh tumhen dúsra Tasallí denewálá baḳhshegá, ki hamesha tumháre sáth rahe;

17 Ya'ne Rúh i Haqq, jise dunyá hásil nahín kar saktí, kyúnki use na dekhtí hai, aur na use jántí hai; lekin tum use jánte ho, kyúnki wuh tumháre sáth rahtí hai, aur tum men howegí.

18 Main tumhen yatím na chhorúngá, main tumháre pás áungá.

19 Ab thorí der hai, ki dunyá mujhe phir na dekhegí; par tum mujhe dekhte ho, aur is liye ki main jítá hún, tum bhí jíoge.

20 Us roz tum jánoge, ki main Báp men, aur tum mujh men, aur main tum men hún.

21 Jis pás mere hukm hain, aur wuh un par 'amal kartá hai, wuhí mujh se muhabbat rakhtá hai; aur wuh jo mujh se muhabbat rakhtá hai, mere Báp ká piyárá hogá, aur main use piyár karúngá, aur apne taín us par záhir karúngá.

22 Yahúdáh ne, na wuh jo Iskriyútí thá, use kahá, Ai Khudáwand, yih kyúnkar hai, ki tú áp ko ham par záhir kiyá cháhtá, aur dunyá par nahín?

23 Yisú' ne jawáb men use kahá,

Agar koí mujhe piyár kartá hai, wnh mere kalám par 'amal karegá, aur merá Báp use piyár karegá, aur ham us pás áwenge, aur us ke sáth rahenge.

24 Jo mujhe piyár nahín kartá, mere kalám par 'amal nahín kartá, aur yih kalám jo tum sunte ho, merá nahín, balki Báp ká hai, jis ne mujhe bhejá hai.

25 Main̄ ne yih báten, tumháre sáth hote húe, tum se kahín.

26 Lekin wuh Tasallí denewálá Rúh i Quds, jise Báp mere nám se bhejegá, wuhí tumhen̄ sab chízen sikhláwegá, aur sab báten, jo kuchh ki main̄ ne tumhen̄ kahí hain, tumhen̄ yád diláwegá.

27 Salám tum logon ke liye chhoṛke játá hún; apní salámatí main̄ tumhen̄ detá hún; na jis tarah se ki dñuyá detí hai, main̄ tumhen̄ detá hún. Tumhárá dil na ghabráe aur na dare.

28 Tum sun chuke ho, ki main̄ ne tum ko kahá, ki Main̄ játá hún, aur tum pás phir átā hún. Agar tum mujhe piyár karte, to tum mere is kahne se, ki Main̄ Báp pás játá hún, khush hote; kyunki merá Báp mujh se baṛá hai.

29 Aur ab main̄ ne tumhen̄, us ke wáqi' hone se peshtar kahá, taki jab ho jáwe, to tum ímán láo.

30 Ba'd is ke main̄ tum se bahut kalám na karúngá; is liye ki is jahán ká sardár átā hai, aur mujh men̄ us kí koí chíz nahín.

31 Lekin is liház se ki dunyá jáne, ki main̄ Báp se muhabbat rakhtá hún, jis tarah Báp ne mujhe farmá diyá, main̄ waisá hí kartá hún. Utho, yahán se chalen.

XV BÁB.

¹ MAIN sachche angúr ká darakht hún, aur merá Báp bágbán hai.

2 Jo dálí mujh men̄ mewa nahín

látí, wuh use tor dáltá hai, aur har ek jo mewa látí, wuh use sáf kartá hai, taki wuh ziyáda mewa láwe.

3 Ab tum us kalám ke sabab, jo main̄ ne tumhen̄ kahá, pák húe.

4 Mujh men qáim ho, aur main̄ tum men̄. Jis tarah ki dálí áp se mewa nahín lá saktí, magar jab ki wuh darakht men qáim ho, usí tarah tum bhí nahín, magar jab ki mujh men qáim ho.

5 Angúr ká darakht main̄ hún, tum dálíán̄ ho: Wuh, jo mujh men qáim hotá hai, aur main̄ us men̄, wuhí bahut mewa látá hai; kyunki mujh se judá tum kuchh nahín kar sakte.

6 Agar koí mujh men qáim na ho, to wuh dálí kí tarah phenk diyá játá, aur súkh játá hai, aur log'unhen baṭorte hain, aur ág men jhonkte hain, aur wuh jalá, játí hain.

7 Agar tum mujh men qáim, aur merí báten tum men qáim howen, to jo cháhoge, māngoge, aur tumháre liye wuhí hogá.

8 Mere Báp ká jalál isi se hai, ki tum bahut mewa láo, so tum mere shágird hoge.

9 Jaisá Báp ne mujhe piyár kiyá, waisá hí main̄ ne tumhen̄ piyár kiyá; tum merí muhabbat men̄ sábit raho.

10 Agar tum mere hukmon par 'amal karo, to tum merí muhabbat men̄ qáim hoge, jaisá ki main̄ ne apne Báp ke hukmon par 'amal kiyá, aur us kí muhabbat men̄ qáim hún.

11 Main̄ ne yih báten tumhen̄ kahín, taki merí khushí tum men̄ baní rahe, aur tumhárí khushí kámil ho.

12 Merá hukm yih hai, ki Jaise main̄ ne tumhen̄ piyár kiyá hai, tum bhí ek dúsre ko piyár karo.

13 Koí shaḥhs us se ziyáda muhabbat nahín kartá, ki apní ján apne doston ke liye de.

14 Jo kuchh ki main̄ ne tumhen̄

farmáyá, agar tum karo, to mere döst ho.

15 Ba'd is ke main tumhen khádim na kahúngá, kyúnki khádim nahín jántá, ki us ká khudáwand kyá kartá hai: balki main ne tumhen döst kahá hai, ki sab báten, jo main ne apne Báp se suní hain, main ne tumhen battalín.

16 Tum ne mujhe nahín chuná hai, balki main ne tumhen chuná hai, aur tumhen muqarrar kiyá hai, ki tum jáo aur mewa láo, aur tumhárá mewa báqí rahe; taki tum merá nám leke, jo kuchh Báp se mángo, wuh tumhen dewe.

17 Main tumhen yih báten farnátá hún, ki Tum ek dúsre ko piyár karo.

18 Agar dunyá tum se dushmaní kartí hai, to tum jánte ho, ki us ne tum se áge mujh se dushmaní kí.

19 Agar tum dunyá ke hote, to dunyá apnon ko piyár kartí: lekin is liye, ki tum dunyá ke nahín, balki main ne tumhen dunyá se chun liyá hai, is wáste dunyá tum se dushmaní kartí hai.

20 Us bát ko jo main ne tum se kahí, yád karo, ki Naukar apne kháwind se bařá nahín. Jab unhoñ ne mujhe satáyá, to we tumhen bhí satáwenge; agar unhoñ ne mere kalám ko maná hai, to we tumhárá bhí mánenge.

21 Lekin yih sab kuchh mere nám ke sabab tum se karenge, kyúnki we use, jis ne mujhe bhejá hai, nahín jánte.

22 Agar main na áyá hotá, aur unhen na kahtá, to un ká gunáh na hotá: lekin ab un pás un ke gunáh ká 'uzr nahín.

23 Wuh jo mujh se 'adáwat kartá hai, mere Báp se bhí 'adáwat kartá hai.

24 Agar main ne un ke bich men ye kám, jo kisí dúsre ne nahín kíe, na kíe hote, to un ká gunáh na hotá; par ab to

unhoñ ne dekhá, aur mujh se aur mere Báp se dushmaní kí.

25 Lekin yih húá, taki wuh kalám jo un kí shari'at men likhá hai, ki Unhon ne mujh se besabah dushmaní kí, púrá ho.

26 Par jab ki wuh Tasallí denewálá, jise main tumháré liye Báp kí taraf se bhejúngá, ya'ne Rúh i Haqq, jo Báp se nikaltí hai, áwe, to wuh mere liye gawáhí degá.

27 Aur tum bhí gawáhí doge, kyúnki tum shurú se mere sáth ho.

XVI BÁB.

1 **M**AİN ne ye báten tumhen kahín, taki tum thokar na kháo.

2 We tum ko 'ibádatkhánon se nikál denge: balki wuh gharí átí hai, ki jo koí tumhen qatl kare, gumán karegá, ki main Khudá kí bandagí bajá látá hún.

3 Aur tum se aisá sulík is liye karenge, ki unhoñ ne na Báp ko jána, aur na mujhe.

4 Aur main ne yih báten tum se kahín, taki jab wuh waqt áwe, to tum yád karo, ki main ne tum se kahín; aur main ne shurú men ye báten tumhen na kahín, kyúnki main tumháré sáth thá.

5 Lekin ab main us pás, jis ne mujhe bhejá, játá hún, aur tum men se koí mujh se nahín púchhtá, ki Tú kahán játá hai.

6 Balki is liye ki main ne ye báten tum se kahín, tumhárá díl gam se bhar gayá.

7 Lekin main tumhen sach kahtá hún, ki Tumháré liye merá jána hí fáida hai: kyúnki agar main na jáín, to Tasallí denewálá tum pás na áwegá; par agar main jáín, to main use tum pás bhej dungá.

8 Aur wuh ánkár dunyá ke gunáh se, aur rástí se, aur 'adálat se taqsírwár thahráegá:

9 Gunáh se, is liye, ki we mujh par ímán nahín lá,e;

10 Rástí se, is liye, ki main apne Báp pás játá hún, aur tum mujhe phir na dekhoge;

11 'Adálat se, is liye, ki is jahán ke sardár par hukm kiyá gayá hai.

12 Merí aur bahut sí báte hain, ki main tumhen kahún, par ab tum un kí bardásht nahín kar sakte.

13 Lekin jab wuh, ya'ne Rúh i Haqq áwe, to wuh tumhen sári sachái kí ráh batáwegí; is liye ki wuh apní na kahegí, lekin jo kuchh wuh sunegí, so kahegí, aur tumhen áyanda kí khabaren degí.

14 Wuh merí buzurgí karegí, is liye ki wuh merí chízon se páwegí, aur tumhen dikháwegí.

15 Sab chízen, jo Báp kí hain, merí hain: is liye main ne kahá, ki wuh merí chízon se legí, aur tumhen dikháwegí.

16 Thorí der aur mujhe na dekhoge; aur phir thorí der aur mujhe dekhoge: kyúnki main Báp ke pás játá hún.

17 Tab us ke ba'ze shágirdon ne ápas men kahá, Yih kyá hai, jo wuh hamen kahtá hai, ki Thorí der aur tum mujhe na dekhoge; aur phir thorí der aur tum mujhe dekhoge; aur yih, Is liye ki main Báp pás játá hún?

18 Phir unhon ne kahá, Yih kyá hai, jo wuh kahtá hai: ki Thorí der? ham nahín jánte, wuh kyá kahtá hai.

19 So Yisú' ne jána, ki we cháhte hain, ki mujhe se suwál karen, tab unhen kahá, Tum ápas men us kí bábat píchhte ho, jo main ne kahá, ki Thorí der aur tum mujhe na dekhoge, aur phir thorí der aur tum mujhe dekhoge?

20 Main tum se sach sach kahtá hún, ki Tum rooge, aur nála karoge, par dunyá khush hogí; aur tum gamgín hoge, lekin tumhárá gam khushí ho jáegá.

21 Jab 'auyat janne lagtí hai, to gamgín hotí hai, is liye ki us kí

gharí á pahunchí: lekin jab larká janí, to is khushí se, ki dunyá men ek ádmí paidá húá, us dard ko phir yád nahín kartí.

22 Pas tum ab gamgín ho, par main tumhen phir dekhungá, aur tumhárá díl khush hogá, aur tumhárí khushí koí tum se chhín na legá.

23 Aur tum us din mujhe se kuchh suwál na karoge. Main tum se sach sach kahtá hún, Jo kuchh tum merá nám leke, Báp se mángoge, wuh tum ko degá.

24 Ab tak tum ne mere nám se kuchh nahín mángá; mángo ki tum páoge, taki tumhárí khushí kámil ho.

25 Main ne ye báte tamsilon men tumhen kahín; par wuh waqt átá hai, ki main tumhen tamsilon men phir na kahungá, balki Báp kí sáf khabar tumhen dungá.

26 Us din tum mere nám se mángoge, aur main tumhen nahín kahtá, ki Main Báp se tumháre liye darkhwást karungá;

27 Is liye ki Báp to áp hí tumhen piyár kartá hai, kyúnki tum ne mujhe piyár kiyá, aur ímán lá,e ho, ki main Khudá se niklá hún.

28 Main Báp se niklá aur dunyá men áyá hún; phir dunyá se rukhsat hotá, aur Báp pás játá hún.

29 Us ke shágirdon ne use kahá, Dekh, ab tú sáf kahtá hai, aur tamsíl men nahín kahtá.

30 Ab ham jánte hain, ki tú sab kuchh jántá hai, aur muhtáj nahín, ki koí tujh se suwál kare; is se ham ímán lá,e, ki tú Khudá se niklá hai.

31 Yisú' ne unhen jawáb diyá, Kyá ab tum ímán lá,e ho?

32 Dekho, gharí átí hai, balki á chukí, ki tum men se har ek paráganda hoke apní ráh legá, aur tum mujhe akelá chhoṛ doge: taubhí main akelá nahín, kyúnki Báp mere sáth hai.

33 Main ne tumhen ye báten kahín, taki tum mujh men itmínán páo. Tum dunyá men musíbat uṭháoge; Ikin kháti-jam'a rakho, ki main ne dunyá ko íta hai.

XVII BÁB.

1 **Y**ISÚ' ne ye báteū farmá, in aur apní ánkheṇ ásmán kí taraf nthá, in, aur kahá, Ai Báp, waqt pahunchá hai; apne Bete ko jalál bakhsh, taki terá Beṭá bhí tujhe jalál bakhshé:

2 Chunánchi tú ne use sab jismon par iκhtiyár diyá hai, taki wuh un sab ko, jinhen tú ne use bakhshá, hamesha kí zindagí dewe.

3 Aur hamesha kí zindagí yih hai, ki we tujh ko akelá sachchá Khudá aur Yisú' Masih ko jise tú ne bhejá hai jánen.

4 Main ne zamín par terá jalál záhir kiyá hai: main us kám ko, jo tú ne mujhe karne ko diyá hai, tamám kar chuká.

5 Aur Ai Báp, ab tú mujhe apne sáth us jalál se, jo main dunyá kí paidáish se peshtar tere sáth rakhtá thá, buzurgí de.

6 Main ne tere nám ko un ádmíon par, jinhen tú ne dunyá men se mujhe diyá, záhir kiyá hai: we tere the, aur tú ne unhen mujhe diyá hai, aur unhon ne tere kalám par 'amal kiyá hai.

7 Ab unhon ne jána hai, ki sab chízen jo tú ne mujhe diyán, terí taraf se hain.

8 Is liye ki main ne we hukm, jo tú ne mujhe díe, unhen díe hain; aur unhon ne unhen qabúl kiyá, aur yaqín jána, ki main tujh se niklá hún, aur we ímán lá,e hain, ki tú ne mujhe bhejá hai.

9 Main un ke liye 'arz kartá hún; main dunyá ke liye nahín, magar un ke liye, jinhen tú ne mujhe diyá hai, 'arz kartá hún, ki we tere hain.

10 Aur sab mere tere hain, aur

tere mere hain; aur main un se buzurgí pátá hún.

11 Main dunyá men áge na rahúngá, par ye dunyá men hain, aur main tujh pás átā hún. Ái quddús Báp, apne hí nám se, unhen, jinhen tú ne mujhe bakhshá, hifázat se rakh, taki we hamári tarah ek hojáwen.

12 Jab tak ki main un ke sáth dunyá men thá, tab tak main ne tere nám se un kí hifázat kí, balki jinhen mujhe diyá hai, main ne un kí nigáhbání kí: aur koí un men se, siwá halákat ke farzand ke, halák nahín húá, taki nawishta púrá ho.

13 Aur ab main tujh pás átā hún, aur main yih báten dunyá men kahtá hún, taki merí khushí un men kámil ho rahe.

14 Main ne terá kalám unhen diyá, aur dunyá ne un se dushmaní kí, is liye ki jaisá main dunyá ká nahín hún, we bhí dunyá ke nahín.

15 Main yih 'arz nahín kartá, ki tú unhen dunyá men se uṭhá le; par yih, ki tú unhen burái se bachá,e.

16 Jaisá ki main dunyá ká nahín hún, we bhí dunyá ke nahín.

17 Unhen apní sachái se pák kar: terá kalám sachái hai.

18 Jis tarah tú ne mujhe dunyá men bhejá, main ne bhí unhen dunyá men bhejá hai.

19 Aur un ke wáste main apní taqdís kartá hún, taki we bhí sachái se muqaddas hon.

20 Main sirf unhín ke liye nahín, balki un ke liye bhí, jo un ke kalám se mujh par ímán láwenge, 'arz kartá hún;

21 Taki we sab ek howen, jaisá ki tú, Ai Báp, mujh men, aur main tujh men, ki we bhí ham men ek hon; taki dunyá ímán láwén, ki tú ne mujhe bhejá hai.

22 Aur wuh jalál jo tú ne mujhe diyá hai, main ne unhen diyá hai; taki we ek hon, jis tarah se ki ham ek hain.

23 Main un men, aur tú mujh men, tákí we ek hoke kámil howen, aur ki dunyá jáne, ki tú ne mujhe bhejá hai, aur jis tarah ki mujhe piyár kiyá, unhen bhí piyár kiyá hai.

24 Ai Báp, main cháhtá hún, ki we bhí jinhen tú ne mujhe baikhshá hai, jahán main hún, mere sáth howen: tákí we mere jalál ko, jo tú ne mujhe baikhshá hai, dekhen: kyúnki tú ne mujhe dunyá kí paidáish se áge piyár kiyá hai.

25 Ai 'adil Báp, dunyá ne tujhe nahín jána, magar main ne tujhe jána hai, aur inhon ne jána hai, ki tú ne mujhe bhejá.

26 Aur main ne terá nám un par záhir kiyá, aur záhir karúngá: tákí wuh piyár, jis se tú ne mujhe piyár kiyá hai, un men ho, aur main un men hún.

XVIII BÁB.

1 YISÚ' yih báten kahke apne shágirdon ke sáth Kadruń ke nále ke pár gayá, jahán ek bágcha thá; us men wuh aur us ke shágird dákhil húe.

2 Aur Yahúdáh bhí, jis ne use pakarwá diyá, wuh jagah jántá thá, ki Yisú' aksar apne shágirdon ke sáth wahán jáyá kartá thá.

3 Tab Yahúdáh sipáhion ká gol aur sardár káhinoń aur Farísion se piyáde leke, mash'alon aur chirágon aur hathyáron ke sáth, wahán áyá.

4 Aur Yisú' ne sab kuchh, jo us par honewálá thá, jánde, áge barhá, aur un se kahá, ki Tum kise dhúndhte ho?

5 Únhoń ne use jawáb diyá, Yisú' Násarí ko. Yisú' ne unhen kahá, ki Main hún. Us waqt Yahúdáh bhí, jis ne use pakarwáyá, un ke sáth khará thá.

6 Aur johín us ne unhen kahá, ki Main hún, we pichhe haṭe, aur zamin par gir paṛe.

7 Tab us ne un se phir púchhá, ki Tum kise dhúndhte ho? We bole, Yisú' Násarí ko.

8 Yisú' ne jawáb diyá, Main ne tumheń kahá ki Main hún; pas agar tum mujhe dhúndhte ho, to inhen jáne do:

9 Yih is liye huá, tákí wuh kalám, jo us ne kahá, púrá ho, ki Jinhen tú ne mujhe diyá, main ne un men se ek ko bhí gum na kiyá.

10 Tab Shama'ún Patras ne talwár, jo us pás thí, khinchí, aur Sardár Káhin ke naukar par chaláí, aur us ká dahná kán urá diyá. Us naukar ká nám Malkús thá.

11 Tab Yisú' ne Patras se kahá, Apní talwár miyán men kar; kyá wuh piyála jo mere Báp ne mujh ko diyá, main na piúń?

12 Tab sipáhí aur súbadár, aur Yahúdion ke piyádon ne milke Yisú' ko pakrá, aur bándhá,

13 Aur pahle use Anná pás le ga,e, kyúnki wuh Qayáfá nám us baras ke Sardár Káhin ká sasurá thá.

14 Yih wuhí Qayáfá thá, jis ne Yahúdion ko saláh dí, ki ummat ke badle ek ká marná bihtar hai.

15 ¶ Par Shama'ún Patras aur dúsra shágird Yisú' ke pichhe ho lie, kyúnki us shágird aur Sardár Káhin men kuchh jánpahchán thí, aur wuh Yisú' ke sáth Sardár Káhin ke dálán men gayá.

16 Lekin Patras darwáze par báhar khará rahá. Tab wuh dúsra shágird jo Sardár Káhin se kuchh jánpahchán rakhtá thá, báhar niklá, aur darbán se kahke Patras ko andar le áyá.

17 Tab us chhokrí ne jo darbán thí, Patras se kahá, Kyá tú bhí is shakhs ke shágirdon men se na-hín? Wuh bolá, kí Main nahín hún.

18 Par naukar aur piyáde koe-loń kí ág sulgákar járe ke sabah se khaṛe húe tápte the, aur Patras un ke sáth khará táp rahá thá.

19 ¶ Tab Sardár Káhin ne Yisú'

se us ke shágirdon aur us kí ta'lím kí bábat suwál kiyá.

20 Yisú' ne use jawáb diyá, ki Maiñ ne áshkárá 'álam se báten kín; maiñ ne hamesha 'ibádat-khánón, aur haikal men, jahán Yahúdí jam'a hote hain, ta'lím dí, aur poshídá kuchh nahín kahá.

21 Tú mujh se kyún púchhtá hai? un se púchhh, jinhon ne mujh se suná, ki maiñ ne unhen kiyá kahá; dekh, ki we jánte hain, jo maiñ ne kahá.

22 Jab us ne yih báten kahín, tab piyádon men se ek ne, jo pás khará thá, Yisú' ko tamáncha márke kahá, Kyún tú Sardár Káhin ko aisá jawáb detá hai?

23 Yisú' ne use jawáb diyá, Agar main ne burá kahá, to burái kí gawáhí de; par agar achchhá kahá, to tú mujhe kyún mártá hai.

24 Aur Anná ne use bandhá húá Qayáfá Sardár Káhin ke pás bhejá thá.

25 Aur Shama'ún Patras khará húá táp rahá. So unhon ne use kahá, Kyá tú us ke shágirdon men se nahín hai? Us ne inkár kiyá, aur kahá, ki Maiñ nahín hún.

26 Phir Sardár Káhin ke naukaron men se ek ne jo us shakhs ká, ki jis ká kán Patras ne kát dálá thá, rishtadár thá, kahá, Kyá maiñ ne tujhe us ke sáth bágcha men nahín dekhá?

27 Tab Patras ne phir inkár kiyá, aur wunhín murg ne báng dí.

28 ¶ Tab Yisú' ko Qayáfá pás se díwánkháne men lá,e, aur yih subh ká waqt thá, aur w khud díwánkháne men na ga,e, táki nápk na howen, balki fasah kháwen.

29 Tab Pilátus un pás nikal áyá, aur kahá, Tum is mard par kyá faryád karte ho?

30 Unhon ne jawáb men kahá, ki Agar yih badkirdár na hotá, to ham use tere hawále na karte.

31 Pilátus ne unhen kahá, Tum

use le jáo, aur apní sharí'at ke mutábiq us kí 'adálat karo. Yahúdión ne use kahá, Ham ko rawá nahín, ki kisi ko ján se máren.

32 Yih is liye húá, táki Yisú' kí bát, jo us ne apní maut kí tarah se ishára karke kahí thí, púri howe.

33 Tab Pilátus phir díwánkháne men dákhil húá, aur Yisú' ko buláke kahá, Kyá tú Yahúdión ká Básdsháh hai?

34 Yisú' ne use jawáb diyá, Tú yih bát áp se kahtá hai, yá ki auron ne mere haqq men tujh se kahá hai?

35 Pilátus ne jawáb diyá, Kyá maiñ Yahúdí hún? Terí hí quaum ne, aur sardár káhinoñ ne tujh ko mere hawále kiyá: tú ne kyá kiyá hai?

36 Yisú' ne jawáb diyá, ki Merí bádhsháhat is jahán kí nahín: agar merí bádhsháhat is jahán kí hotí, to mere naukar lařáí karte, táki maiñ Yahúdión ke hawále na kiyá játá; par merí bádhsháhat yahán kí nahín.

37 Tab Pilátus ne use kahá, So kyá tú bádhsháh hai? Yisú' ne jawáb diyá, ki Jaisá áp farmáte, main bádhsháh hún. Maiñ is liye paidá húá, aur is wáste dunyá men áyá, ki haqq par gawáhí dún. So jo koí, ki haqq se hai, merí áwáz suntá hai.

38 Pilátus ne use kahá, ki Haqq kiyá hai? Yih kahke phir Yahúdión pás báhar gayá, aur unhen kahá, Maiñ us ká kuehh quşür nahín pátá.

39 So tumhárá dastúr hai, ki main fasah men tumháre liye ek ko chhoṛ dún; kyá tum cháhte ho, ki main tumháre liye Yahúdión ke Básdsháh ko chhoṛ dún?

40 Tab un sabhon ne phir chil-láke kahá, ki Is ko nahín, balki Barabbás ko. Par Barabbás baṭ-máṛ thá.

XIX BÁB.

TAB Pilátús ne Yisú' ko pakarke koṛe máre.

2 Aur sipáhíon ne kántón ká táj sajke us ke sīr par rakhá, aur use argawáni poshák pahináke kahá,

3 Ai Yahúdión ke Básdsháh, Salám! aur unhoṇ ne use tamánche máre.

4 Tab Pilátús ne phir báhar jáke unhen kahá, ki Dekho, maiṇ use tum pás báhar le áyá hún, taki tum jáno, ki maiṇ us ká kuchh qusúr nahín páta.

5 Tab Yisú' kántón ká táj rakhe, aur argawáni poshák pahine húc báhar áyá. Aur Pilátús ne un se kahá, Dekho is shakhs ko!

6 So jab sardár káhin, aur piyádon ne use dekhá, to chilláke kahá, ki Salíb de, salíb de! Pilátús ne unhen kahá, Tumhín use lo, aur salíb do, kyúṇki main us men kuchh qusúr nahín páta.

7 Yahúdión ne use jawáb diyá, ki Ham shari'atwále hain, aur hamári shari'at ke mutábiq wuh qatl ke láiq hai, is liye ki us ne apne taín Khudá ká Betá thahráyá.

8 ¶ Jab Pilátús ne yih bát suní, to ziyáda dará;

9 Aur díwánkháne men phir andar áke Yisú' se kahá, Tú kahán ká hai? Par Yisú' ne use kuchh jawáb na diyá.

10 Tab Pilátús ne use kahá, ki Tú mujh se nahín boltá? kyá tú nahín jántá, ki mujhe ikhtiyár hai, cháhún to tujhe salíb dún? aur cháhún to tujhe chhor dún?

11 Yisú' ne jawáb diyá, ki Agar yih tujhe úpar se diyá na játá, to mujh par terá kuchh ikhtiyár na hotá: so jis ne mujhe tere hawále kiyá, us ká gunáh baṛá hai.

12 Us waqt Pilátús ne iráda kiyá, ki use chhor de; par Yahúdión ne chilláke kahá, ki Agar tú is mard ko chhor detá hai, to tú

Qaisar ká khairkhwáh nahín; jo koí apne taín bádsháh thahrátá hai, wuh Qaisar ká muḥkálf hoke boltá hai.

13 ¶ Pilátús yih bát sunkar Yisú' ko báhar láyá, aur us maqám men jo Chabútara aur 'Ibrání men Gabatá kahlátá hai, masnad par baithá.

14 Aur fasah kí taiyári ká din thá, aur chhaṭhe ghanṭe ke qarib thá. Phir us ne Yahúdión ko kahá, ki Dekho apná Básdsháh?

15 Tab we chillá,e, ki Le já, le já, use salíb de. Pilátús ne unhen kahá, Kyá main tumháre Básdsháh ko salíb dún? Sardár káhinon ne jawáb diyá, ki Qaisar ke siwá, hamára koí bádsháh nahín hai.

16 Tab us ne use un ke hawále kiyá, ki use salíb dí jáwe. Aur we Yisú' ko pakarke le ga,e.

17 So wuh apní salíb ut्थáe húe, us jagah ko, jo khopré ká maqám kahlátá hai, jis ká tarjuma 'Ibrání men Galgatá hai, gayá:

18 Wahán unhoṇ ne use aur us ke sáth do aur ko salíb par khínchá, tarfaín men ek ek, aur Yisú' ko bich men.

19 ¶ Aur Pilátús ne ek kitába likhá, aur salíb par lagá diyá. Wuh likhá yih thá ki YISÚ' NÁSARÍ YAHÚDÍON KÁ BÁDSHÁH.

20 Us kitába ko bahut se Yahúdión ne paṛhá, is liye, ki wuh maqám, jahán Yisú' salíb par khínchá gayá thá, shahr ke nazdik thá, aur wuh 'Ibrání, aur Yúnání, aur Latíní men likhá thá.

21 Tab Yahúdión ke sardár káhinon ne Pilátús ko kahá, ki Yahúdión ká Básdsháh mat likh: balki yih likh, ki Us ne kahá, ki Main Yahúdión ká Básdsháh hún.

22 Pilátús ne jawáb diyá, ki Main ne jo likhá, so likhá.

23 ¶ Phir sipáhíon ne jab Yisú' ko salíb par khínch chuke, to us ke kapron ko liyá, aur chár hisse

kíe, har sipáhí ke liye ek hissa; aur us ke kurte ko bhí liyá: aur kurtá bin siyá sarásar biná húá thá.

24 Is liye unhon ne ápas men kahá, ki Ham use ná pháren, balki us par chitthí dálen, ki yih kis ká hogá: yih is liye húá, ki nawishta jo kahtá hai, ki Unhon ne merí poshák bánt lí, aur mere kurte ke liye chitthián dálín, púrá howe. So sipáhíon ne aise hí kiyá.

25 ¶ Tab Yisú' kí salíb pás, us kí má, aur us kí má kí bahin Mariyam Klíopás kí jorú, aur Mariyam Magdalíni khari thín.

26 Yisú' ne apní má ko, aur us shágird ko, jise wuh piyár kartá thá, pás khare húé dekhkar, apní má ko kahá, ki Ai 'aurat, dekh, yih terá betá!

27 Phir us ne us shágird ko kahá, Dekh, yih terí má! Aur usí gharí se us shágird ne use apnon men shámil kiyá.

28 ¶ Ba'd us ke Yisú' ne jánke, ki ab sab báten púrí ho chukín, yih kahá, tákí nawishta púrá howe, ki Main pyásá hún.

29 Wahán ek bartan sirke se bhará húá dhará thá: unhon ne isfanj ko sirke men tar karke aur zúfá men lapeṭke, nal par rakhá, aur us ke munh men diyá.

30 Phir Yisú' ne jab sirká chakká, to kahá, Púrá húá, aur sir jhukáke ján dí.

31 Phir Yahúdión ne is liház se ki láshen sabt ke din salíbon par na rah jáwen, kyúnki wuh din taiyári ká thá, balki bará hí sabt thá, Pilátús se 'arz kí, ki un kí tángen torí aur láshen utári já,en.

32 Tab sipáhíon ne áke pahle aur dúsre kí tángen, jo us ke sáth salíb par khínche ga,e the, torín.

33 Lekin jab unhon ne Yisú' kí taraf áke dekhá, ki wuh mar chuká hai, to us kí tágen na torín:

34 Par sipáhíon men se ek ne bhále se us kí paslí chhedí, aur filfaur us se lahú aur páni niklá.

35 Aur jis ne yih dekhá, gwáhí dí, aur us kí gawáhí sachchí hai, aur wuh jántá hai, ki sach kahtá hai, tákí tum ímán láo.

36 Kyúnki, yih báten húin ki nawishta púrá howe, kí Us kí koí haddí torí na jáegí.

37 Aur phir dúsra nawishta is mazmún ká hai, ki We us par, jise unhon ne chhedá, nazar karenge.

38 ¶ Aur ba'd us ke, Yúsú Aramatíyá ne, jo Yisú' kí shágird thá, lekin Yahúdión ke dar se poshida men, Pilátús se ijázat cháhí, ki Yisú' kí lásh ko le jáwe, aur Pilátús ne ijázat dí. So wuh áke Yisú' kí lásh le gayá.

39 Aur Niqúdemús bhí jo pahle Yisú' pás rát ko gayá thá, áyá, aur pachás ser kí atkal murr aur 'úd miláke láyá.

40 Phir unhon ne Yisú' kí lásh leke, sútí kapre men khushbuíon ke sáth, jis tarah se ki dasan karne men Yahúdión ká dastúr hai, kafnáyá.

41 Aur wahán, jis jagah ki use salíb dí ga,i thí, ek bág thá, aur us bág men ek na,i qabr thí, jis men kabhú koí na dhará gayá thá.

42 So unhon ne Yisú' ko Yahúdión kí taiyári ke din ke bá'is wahín rakhá, kyúnki yih qabr nazdik thí.

XX BĀB.

HAFTÉ ke pahle din Mariyam Magdalíni tarke, aisá ki hanoz andherá thá, qabr par á,i, aur patthar ko qabr se tálá húá dekhá.

2 Tab wuh, Shama'ún Patras aur us dúsre shágird pás, jise Yisú' piyár kartá thá, dauri á,i, aur unhen kahá, ki Khudáwand ko qabr se nikál le ga,e, aur ham nahín jánte, ki unhon ne use kahán rakhá.

3 Phir Patras aur wuh dúsra

shágird nikle, aur qabr kí taraf ga,e.

4 Chunánehi we donon ikaṭhe daure, par dúsra shágird Patras se bār̄h gayá aur qabr par pahle pahunchá.

5 Us ne jhnkke sútí kapre pare dekhe, par wuh andar na gayá.

6 Tab Shama'ún Patras us ke píchhe pahunchá, aur qabr ke andar gayá, aur sútí kapre pare húe dekhe,

7 Aur wuh rúmál, jis se us ká sir bandhá thá, un sútí kapron ke sáth nahín, par judá lapetá húa ek jagah pará dekhá.

8 Tab dúsra shágird bhí, jo qabr par pahle áyá thá, andar gayá, aur dekhke yaqín kiyá.

9 Kyúnki we hanoz nawishta ko na jánte the, ki murdon men se us ká jí uṭhná zarúr hai.

10 Tab we shágird apne logon pás phir ga,e.

11 ¶ Lekin Mariyam báhar qabr par rotí khai rahi, aur rote húe, jab ki qabr men jhukke nazar kí,

12 To do firshton ko sufed poshák men, ek ko sirháne, aur dúsre ko pá, etáne, jahán Yisú' kí lásh rakhí thí, baiṭhe dekhe;

13 Jinhon ne use kahá, Ai'aurat, tú kyún rotí hai? Us ne kahá, Is liye, ki we mere Khudáwand ko le ga,e, aur main nahín jántí, ki unhon ne use kahán rakhá.

14 Jab wuh yún kah chukí, to píchhe phirí, aur Yisú' ko khaṛe dekhá, aur na pahcháná, ki wuh Yisú' hai.

15 Yisú' ne use kahá, ki Ai'aurat, tú kyún rotí hai? kis ko dhúndhtí hai? Us ne use bágban jánke kahá, ki Ai sáhib, agar us ko yahán se uṭhayá ho, to mujh se kah, ki use kahán rakhá hai, ki main use le jáungí.

16 Yisú' ne use kahá, Ai Mariyam. Wuh mutawajjih húi, aur use kahá, Rabbóní: ya'ne Ai ustád.

17 Yisú' ne kahá, Mujh ko mat chhú; kyúnki main hanoz úpar apne Báp ke pás nahín gayá: par mere bháion pás já, aur unhen kah, ki Main úpar apne Báp, aur tumháre Báp pás, aur apne Khudá aur tumháre Khudá pás játā hún.

18 Mariyam Magdalíni á,i, aur shágirdon se kahá, ki Main ne Khudáwand ko dekhá, aur us ne mujh se yih báten kahín.

19 ¶ Phir usí din, jo hafte ká pahlá thá, shám ke waqt, jab us jagah ke darwáze, jahán sab shágird jam'a húe the, Yahúdión ke dar se, band the, Yisú' áyá, aur bich men khará húa, aur unhen kahá, Tum par salám.

20 Aur yún kahke apne háthon aur paslí ko unhen dikháyá. Tab shágird Khudáwand ko dekhke khush húe.

21 Aur Yisú' ne phir unhen kahá, Tum par salám; jis tarah Báp ne mujhe bhejá hai, main bhí usí tarah tumhen bhejtá hún.

22 Us ne yih kahke un par phúnká, aur kahá, ki Tum Rúh i Quds leo:

23 Jin ke gunáhon ko tum bakhsho, un ke gunáh baķhshe játe hain; jinhen tum na baķhshoge, na baķhshé jáenge.

24 ¶ Aur Thúmá un bárahon men se ek, jis ká laqab Didumús thá, Yisú' ke áte waqt un ke sáth na thá.

25 Tab aur shágirdon ne use kahá, ki Ham ne Khudáwand ko dekhá hai. Par us ne unhen kahá, Jab tak ki main us ke háthon men mekhon ke nishán na dekhún, aur mekhon ke nishánon men apní unglí na dálún, aur apne háth ko us kí paslí par na rakhún, kabhú yaqín na karúngá.

26 ¶ Áth roz ke ba'd jab us ke shágird phir andar the, aur Thúmá un ke sáth thá, to darwáze band hote húe Yisú' áyá, aur bich men khará hoke bolá, Tum par salám.

27 Phir us ne Thúmá ko kahá, ki

Apní unglí pás lá, aur mere háthon ko dekh, aur apná háth pás lá, aur use merí paslí par rakh, aur beímán mat ho, balki ímán lá.

28 Thúmá ne jawáb men use kahá, Ai mere Khudáwand, aur ai mere Khudá.

29 Yisú' ne use kahá, Thúmá, is liye ki tú ne mujhe dekhá hai, tú ímán láyá: mubárak we hain, jin hon ne nahín dekhá, taubhí ímán lá,e.

30 ¶ Aur bahut se aur mu'ajize, jo is kitáb men likhe nahín ga,e, Yisú' ne apne shágirdon ke sámne dikhá,e.

31 Lekin ye likhe ga,e, taki tum ímán láo ki Yisú' Masíh Khudá ká Betá hai, aur taki tum ímán láke us ke nám se zindagí páo.

XXI BÁB.

1 AUR ba'd us ke, Yisú' ne phir apne taín daryá e Tiberiyás ke kináre par shágirdon ko dikháyá, aur is tarah záhir húá, ki,

2 Shama'ún Patras aur Thúmá jo Didumús kahlátá hai, aur Náthanáel jo Káná e Galíl ká hai, aur Zabdí ke bete, aur us ke shágirdon men se aur do ikaṭthe the.

3 Shama'ún Patras ne unhen kahá, ki Main machhlí ke shikár ko játá hún. Unhon ne us se kahá, Ham bhí tere sáth challenge; aur nikalke filsaur kishtí par charhe; par us rát ko kuchh na pakrá.

4 Aur jab subh húí, to Yisú' kináre par khará thá; lekin shágirdon ne na jáná, ki wuh Yisú' hai.

5 Tab Yisú' ne unhen kahá, Ai larko, kyá tumháre pás kuchh kháne ko hai? Unhon ne jawáb diyá, ki Nahín.

6 Us ne un se kahá, Kishtí ki dahni taraf jál dálo, to tum páoge. Pas unhon ne dálá, tab machhlíon ki bahutáyat se usekhhinch na sake.

7 Is liye us shágird ne, jise Yisú' piyár kartá thá, Patras se kahá, ki Yih Khudáwand hai. So Shama'ún Patras ne sunke, ki wuh Khudáwand hai, kurtá kamar se bándhá, kyúŋki wuh nangá thá, aur apne taín daryá men dál diyá.

8 Aur báqí shágird machhlíon ká jál khínchte húe kishtí par á,e, kyúŋki wé kináre se dúr na the, magar do sau háth ke aṭkal.

9 Jon kináre par á,e, wahán unhon ne koelon kí ág, aur us par machhlí rakhí húí aur rotí dekhí.

10 Yisú' ne unhen kahá, Un machhlíon men se, jo tum ne pakrín, láo.

11 Shama'ún Patras ne jáke jál ko ek sau tirpan barí machhlíon se bhare húe khíncrá: aur agarchi machhlíán us bahutáyat se thín, par jál na phatá.

12 Yisú' ne unhen kahá, Áo, kháná kháo. Aur shágirdon men se kisí ko jurat na húí, ki us se púchhe, ki Tú kaun hai, kyúŋki wé jánte the, ki wuh Khudawand hai.

13 Tab Yisú' ne áke rotí lí, aur unhen dí, aur usí tarah se machhlí dí.

14 Yih tísrá martaba thá, ki Yisú' ne, murdon men se jí uṭhne ke ba'd, apne taín shágirdon ko dikháyá.

15 ¶ Aur jab we kháná khá chuke, to Yisú' ne Shama'ún Patras ko kahá, Ai Yúmas ke bete Shama'ún, kyá tú mujhe in se ziýáda piyár kartá hai? Us ne use kahá, Hán, Ai Khudáwand; tú khud jántá hai, ki main tujhe piyár kartá hún. Us ne use kahá, ki Mere barre chará.

16 Us ne do bára use phir kahá, ki Ai Shama'ún Yúmas ke bete, áyá, tú mujhe piyár kartá hai? Wuh bolá, ki Hán, Ai Khudáwand, tú to jántá hai, ki main tujh ko piyár kartá hún. Us ne use kahá, ki Merí bheren chará.

17 Us ne use tísré martabe kahá,

ki Ai Shama'ún Yúnas ke beṭe,
áyá, tú mujhe piyár kartá hai ?
Tab Patras is liye, ki us ne tísri
bár us se kahá, ki Áyá, tú mujhe
piyár kartá hai, dilgír húá, aur
use kahá, Ai Khudáwand, tú to
sab kuchh jántá hai ; balki tujhe
ma'lúm hai, ki main tujhe piyár
kartá hún. Yisú' ne use kahá,
Tú merí bheren chará.

18 Main tujh se sach sach kahtá
hún, ki Jab tak ki tú jawán thá,
tú áp apní kamar bándhtá thá, aur
jahán kahín cháhtá thá, játá thá :
par jab tú búrhá hogá, to apne
háthon ko phailáegá, aur dúsrá
terí kamar bándhegá, aur wahán
jahán tú na cháhe, tujhe le já, egá.

19 Us ne in báton se patá diyá,
ki wuh kaun sí maut se Khudá
ká jalál záhir karegá; aur yih
kahke use phir kahá, ki Mere
pichhe ho le.

20 Tab Patras ne phirke us
shágird ko, jise Yisú' piyár kartá
thá, aur jis ne rát ko us ke síme
par jhukke púchhá, ki Ai Khudá-

wand, wuh jo tujhe pakarwátá
hai, kaun hai, pichhe áte dekhá.

21 Patras ne use dekhke Yisú'
ko kahá, Ai Khudáwand, is shaḥks
ká kyá hogá ?

22 Yisú' ne use kahá, Agar main
cháhún, ki jab tak main áún, wuh
yahíñ thahre, to tujh ko kyá ? tú
mere pichhe ho le.

23 Tab bháion men yih bát
mashhúr húí, ki wuh shágird na
maregá ; lekin Yisú' ne use nahín
kahá, ki Wuh na maregá, magar
yih kahá, ki Agar main cháhún,
ki mere áne tak thahre, to tujh
ko kyá ?

24 Yih wuh shágird hai, jis ne
in kámon kí gawáhí dí, aur in
báton ko likhá, aur ham ko yaqín
hai, ki us kí gawáhí sach hai.

25 Par aur bhí bahut se kám
hain, jo Yisú' ne kíe, aur agar
we judá judá likhe játé, to main
gumán kartá hún, ki kitáben jo
likhí játín, dunyá men na samá
saktín. Āmín.